

人物(仕績)

脩遠通志稿卷八十八第一。三冊

綏遠通志稿卷八十八

人物(仕績)

前序謂土生而出仕者曰鄉宦。外來而臨民者曰仕績。茲依此例輯歷代外籍嘗官於斯土者若干人備考覽焉。

↑前漢

孟舒嘗事趙王張敖。高帝八年趙相貫高等謀逆事發。下詔捕敖及羣臣反者。有敢隨趙王罪三族。惟田叔、孟舒等十餘人赭衣自髡。鉗隨敖至長安。敖事白得出。乃進言叔等十人上。召見與語。漢廷臣無能出其右者。上悅。盡拜為郡守。諸侯相。舒為雲中守。及文帝初立。召漢中守田叔。問曰。公知天下長者乎。對曰。臣何足以知之。上曰。公長者宜知之。叔頓首曰。故雲中守孟舒。長者也。是時舒坐寇大入雲中。免。上曰。先帝

置孟舒雲中十餘年矣。虜常一入，孟舒不能堅守，無故士卒戰死者數百人。長者固殺人乎？叔叩頭曰：夫貫高等謀反，天子下明詔，趙有敢隨張王者，罪三族。然孟舒自髡鉗，隨張王，以身死之，豈自知為雲中守哉？漢與楚相距，士卒罷敝，而匈奴冒頓新服，北夷來為邊寇。孟舒知士卒罷敝，不忍出言，士爭臨城死敵，如子為父，以故死者數百人。孟舒豈毆之哉？是乃孟舒所以為長者。於是上曰：賢哉！孟舒復召以為雲中守。魏尚，槐里人，為雲中守，軍市租盡以給士卒，出私養錢五日，一殺牛以饗賓客，軍吏舍人匈奴遠避，不近雲中之塞。寇嘗一入，尚率車騎擊之，所殺甚衆。坐上功，首虜差六級，下之吏，削其爵。後文帝令馮唐持節赦尚，復以為雲中守。

李廣隴西成紀人，世世受射。景帝時為雁門雲中太守，武帝

即位。左右言廣名將也。由是入為未央衛尉。後四歲。廣以衛尉為將軍。出雁門擊匈奴。匈奴兵多破廣軍。生得廣單于素聞廣賢。令曰。得李廣必生致之。胡騎得廣。廣時傷。置兩馬間。絡而盛之。卧行十餘里。廣陽死。晚其傍有一免。騎善馬。暫騰而上。胡免馬因抱免。鞭馬南馳。數十里。得其餘軍。匈奴騎數百追之。廣行取免弓射殺追騎。以故得脫。於是至漢。漢下廣吏當斬。贖為庶人。居無何。為右北平太守。匈奴號曰漢飛將軍。避之數歲不入界。元朔六年。廣復為將軍。從大將軍出定襄。諸將多為侯者。而廣軍無功。廣歷七郡太守。前后四十餘年。得賞賜。輒分其麾下。飲食與士卒共之。家無餘財。終不言生產事。將兵之絕處。見水。士卒不盡飲。不近水。不盡餐。不嘗食。寬緩不苛。士以此愛樂為用。元狩四年。大將軍驃騎將軍

大擊匈奴。令廣引兵與右將軍趙食合軍出東道。惑失道。後
大將軍長史急責廣之幕府上簿。遂引刀自剄。百姓聞之。知
與不知。老壯皆為垂泣。

常惠。太原人。西河太守。元狩四年。大將軍青出定襄。擊匈奴。
還。吏卒無封者。唯西河太守常惠。雲中太守遂成。受賞。遂成。
諸侯相。賜食邑二百戶。黃金百斤。惠爵關內侯。

杜延年。字幼公。南陽人。周子。明法律。昭帝始元四年。封建平
侯。宣帝即位。益戶二千三百。為西河太守。治甚有名。五鳳中。
徵入為御史大夫。薨。諡曰敬侯。

辛慶忌。字子真。狄道人。成帝初。大將軍王鳳薦慶忌。質行正。
直。仁勇。得衆心。徵為光祿大夫。執金吾。數年。坐小法。左遷為
雲中太守。

班伯其先與楚同姓。令尹子文之後也。河平中，單于來朝，上使伯持節迎於塞下。會定襄大姓石季羣輩報怨殺追捕吏伯上狀，因自請願試守期月。上即拜伯為定襄太守。定襄聞伯素貴，年少，自請治劇，畏其下車作威，吏民竦息。伯至，請問耆老，父祖故人有舊恩者，迎延滿堂，日為供具。執子孫禮郡中，益弛諸所賓禮，皆名豪，懷恩醉酒，共諫伯宜頗攝錄盜賊。具言本謀亡匿處，伯曰：「是所望於父師矣。」乃召屬縣長吏，選精進掾史分部收捕，及他隱伏，旬日盡得。郡中震栗，咸稱神明。歲餘，上徵伯以為侍中、光祿大夫。

馮立，字聖卿，奉世子。上黨潞人。元帝竟寧中，出為五原屬國都尉。數年，遷五原太守。徙西河上郡，立居職，公廉治行，略與兄野王相似，而多智，有恩貸，好為條教，吏民嘉美。野王立相

代為太守稱之曰大馮君小馮君。

案漢書列傳中尚有二人曾任北邊郡職。一為翟方進。一為義縱。方進於河平中為博士。數年遷朔方刺史。居官不煩苛。所察應條輒舉。甚有威名。義縱為定襄太守。縱至掩定襄獄中重罪二百餘人。及賓客昆弟私入相似視者亦二百餘人。縱壹切捕鞠曰。為死罪。解脫。是日皆報殺四百餘人。郡中不寒而栗。縱治郡雖慘刻。然亦綏境一舊聞也。原志稿未錄。茲特輯補之。

↑後漢

郭伋字細侯。扶風茂陵人也。建武十一年。省朔方刺史。屬并州。調伋為并州牧。伋在并州。素結恩德。所到縣邑。老幼相攜。逢迎道路。始至行部。到西河美稷。有童兒數百。各騎竹馬。於

道次迎拜。伋問免曹何自遠來。對曰：聞使君到，喜故來奉迎。伋辭謝之。及事訖，諸免復送至郭外，問使君何日當還。伋謂別駕從事計日當告之。行部既還，先期一日，伋為違信於諸免。遂止於野亭，須期乃入。伋以老病上書乞骸骨。二十二年，徵為太中大夫。明年卒，時年八十六。帝親臨弔，賜冢塋地。廉范，字叔度，京兆杜陵人。趙將廉頗之後也。永平初，舉茂才。數月，遷雲中太守。會匈奴大入塞，烽火日通，故事虜人過五千人，移書傍郡。吏欲傳檄求救，范不聽，自率士卒拒之。虜衆盛而范兵不敵，會日暮，令軍士各交縛兩炬，三頭爇火。營中星列，虜遙望火，多謂漢兵救至，大驚。待旦，將退。范乃令軍中蓐食，晨往赴之，斬首數百級。虜自相躡藉，死者千餘人。由此不敢復向雲中。

馬襄為河西長史。永平五年冬，北匈奴六七千騎入於五原，塞遂寇雲中，至陽原南。單于擊卻之，襄赴救，虜乃引去。成嚴為雲中太守，建光元年秋，鮮卑其至，韃寇居庸，成嚴擊之，兵敗散。功曹楊穆以身捍嚴，與俱戰沒。

宋漢字仲和，以經行著名，舉茂才，四遷西河太守，度遼將軍。立名節，以威恩著稱，拜太中大夫。卒，策曰：宋漢清修雪白，正直無邪，前在方外，仍統軍實懷柔異類，莫匪嘉績。戎車載載，邊人用寧。予錄乃勲，引登九列，因病退讓，守約彌堅。將授三事，未克而終。朝廷愍悼，但其愴然，詩不云乎：肇敏戎功，用錫爾祉。其令將相大夫會葬，加賜錢十萬，及其在殯，以全素絲羔羊之節焉。

耿夔字定公，為長水校尉，拜五原太守，遷遼東太守。永初三

年鮮卑畔出塞。夔不能獨進。以不窮追。左轉雲中太守。陳龜字叔珍。上黨泫氏人。家世邊將。便習弓馬。雄於北州。龜少有志氣。永建中。舉孝廉。五遷。五原太守。永和五年。拜使匈奴中郎將。時南匈奴左部反亂。龜以單于不能制。下外順內叛。促令自殺。坐微_徵下獄。免。崔實字子真。一名台。字元始。少沈靜。好典籍。桓帝初。詔公卿郡國舉至孝獨行之士。實以郡舉。徵詣公車。病不對策。除為郎。明於政體。吏才有餘。論當世便事數十條。名曰政論。指切時要。言辯而確。當世稱之。召拜議郎。遷大將軍梁冀司馬。與邊韶延篤等著作東觀。出為五原太守。五原土宜麻枲。而俗不知織績。民冬月無衣。積細草而卧其中。見吏則衣草而出。實至官。斥賣儲待。為作紡績織絰練縵之具。以教之。民得以

免寒苦。是時胡虜連入雲中，朔方殺略吏民，一歲至九奔命。實整厲士馬，嚴烽堠，虜不敢犯，常為邊最。母劉氏有母儀淑德，博覽書傳，實在五原。常訓以臨民之政，實之善績。母其有助焉。

陳翔字子麟，汝南邵陵人。祖父珍，司隸校尉。翔少知名，善交結。察孝廉，太尉周景辟舉高第，拜侍御史，奏大將軍梁冀恃貴不敬，時人奇之。遷定襄太守，坐黨事，考黃門北寺獄，以無驗見原，卒於家。

案度遼將軍前漢專以制烏桓，范明友嘗任之，旋廢。且事與綏遠無涉，故不言之。後漢之度遼將軍置於永平八年。屯五原之曼柏，與五原太守治所並在今包頭縣境內。惟本志職官篇已有度遼將軍表載其姓名，略歷及任職去。

職年月較詳。是以此篇但述刺史太守，不再復述度遼將軍也。

↑魏

陳泰，字玄伯，潁川許昌人。正始中，徙遊擊將軍為并州刺史，加振威將軍，使持節護匈奴中郎將，懷柔夷民，甚有威惠。京邑貴人多寄寶貨，因泰市匈奴婢，泰皆掛之於壁，不發其封。及徵為尚書，悉以還之。後官至尚書右僕射。景元元年薨，追贈司空，諡穆侯。

孫禮，字德達，涿郡容城人。時匈奴主劉靖部衆彊盛，而鮮卑數寇邊，乃以禮為并州刺史，加振武將軍，使持節護匈奴中郎將。後入為司隸校尉，凡臨七郡五州，皆有威信。遷司空，封大利亭侯。嘉平二年薨，諡曰景侯。

畢軌字昭先。明帝在東宮時，軌在文學中。明帝即位，入為黃門郎，遷并州刺史。其在并州，名為驕豪。時雜虜數為暴，害吏民。軌輒出軍擊鮮卑，輒比能，失利。中護軍蔣濟表曰：「畢軌前失，既往不咎。今失并州，換置他州，不毀其德於國事實善。此安危之要，唯聖恩察之。」正始中，入為中護軍。

魯芝字世英，扶風人。初為大將軍曹爽司馬，爽既誅，即擢芝為并州刺史。以後仕進至特進、光祿大夫。

↑
後魏

安原，遼東人，雅性矜嚴。沈勇多智畧。明元時，為獵郎，出監雲中軍事。時赫連屈丐犯河西，原以數十騎擊之，殺十餘人。帝以原輕敵，違節度加罪。然知原驍勇遂任以為將，鎮雲中。蠕蠕犯塞，原輒破之，以功賜爵武原侯。

段進不知何許人。太武初為白道守將。蠕蠕大檀入塞圍之。力屈被執。進抗聲大罵。遂為賊殺。帝愍之。追贈安北將軍。賜爵顯美侯。諡曰壯。

司馬楚之。字德秀。晉宣帝弟太常。廋之八世孫。年十七。會劉裕誅夷司馬氏。楚之乃逃匿諸沙門中。明元末。遣使請降。授荊州刺史。太武初。徵入朝。授安南大將軍。封瑯邪王。車駕征蠕蠕。楚之與濟陰公盧中山等督運。以繼大軍。時鎮北將軍封沓亡入蠕蠕。說令擊楚之。以絕糧運。蠕蠕乃遣覘楚之軍。截驢耳而去。有告失驢耳者。楚之曰。必是覘賊。截之。以為驗耳。賊將至矣。乃伐柳為城。灌水令凍。城立而賊至。不可攻逼。乃走散。太武聞而嘉之。尋拜假節侍中。鎮西大將軍。開府儀同三司。雲中鎮大將。朔州刺史。在邊二十餘年。以清儉著聞。

和平五年薨。時年七十五。高宗悼惜之。謚貞王。陪葬金陵。
司馬躍。字寶龍。楚之次子。尚趙郡公主。拜駙馬都尉。代兄金
龍為雲中鎮將。朔州刺史。假安北將軍。河內公。躍表罷河西
苑封。與民墾殖。有司執奏。此麋鹿所聚。太官取給。今若與民
至於奉獻。時禽懼有所闕。詔曰。此地若任稼穡。雖有獸利。事
須廢封。若是山澗。虞禁何損。尋先朝置此。豈苟藉斯禽。亮亦
以俟軍行薪蒸之用。其更論之。躍固請宜以與民。高祖從之。
太和十九年卒。贈金紫光祿大夫。楚之父子相繼鎮雲中。朔
土服其威德。
元安壽。陽平王新成長子。高祖賜名頤。累遷懷朔鎮大將。都
督三道諸軍事。北討。詔徵赴京。勗以戰伐之事。對曰。當仰仗
廟算。使呼韓同渭橋之禮。帝嘆曰。壯哉。王言。朕所望也。未發。

遭母憂。詔遣侍臣以金革敦喻。既殯而發。與陸叡集三道諸將議軍途所詣。於是中道出黑山東道趨士盧河西道向侯延河軍過大磧大破蠕蠕。頤入朝。詔曰。王之前言果不虛也。後除朔州刺史。及恒州刺史。穆泰謀反。遣使推頤為主。頤密以狀聞。泰等伏誅。帝甚嘉之。世宗景明元年。薨於青州刺史。諡曰莊王。

元長壽皇興二年。封城陽王。拜西大將軍。外都大官。出為沃野鎮都大將。性聰惠。善撫接。在鎮甚有威名。延興五年。薨。諡康王。

↑北周

王雅。字度容。闡熙新固人也。少沉毅。木訥寡言。有膽勇。善騎射。周文聞其名。召入軍。以功賜爵。居庸縣子。從禽竇泰於潼

關沙苑之戰。雅謂所部曰：彼軍殆有百萬，今我不滿萬人，常
理論之，實難與敵。但相公神武，以順討逆，豈計衆寡？大丈夫
不以此時破賊，何用生為？乃擐甲出戰，所向披靡。周文壯之，
又從戰芒山。時大軍失利，諸將皆退，雅獨拒之。敵人見其無
繼，步騎競進。雅左右奮擊，斬九級，敵衆稍退。雅乃還。周文歎
曰：王雅舉身悉是膽也。進爵為伯，累遷驃騎大將軍，開府儀
同三司。明帝初，除汾州刺史，勵精為政，人庶悅附。自遠至者
七百餘家。卒於夏州刺史。

案周書王雅傳，叙雅兩為夏州刺史，其籍貫為闡熙新固
人。北史雅傳作新固人。雅子世積，在隋書有傳，又作新固
人。而魏書地形志載闡熙郡領山鹿新固二縣，又與周書
北史、隋書不同。是一縣之名，而有新固、新固、新固之

殊。雖古地名多奇字。然亦何至紛糅如此。是必古籍傳抄有誤也。考囙、囙二字皆字書所無。惟囙為古文國字。然則王氏之本貫非新固。即新固矣。本條雖用北史。但標出周書、隋書、魏書之異名。亦可以資參證焉。

↑隋

王韶字子相。自云太原晉陽人。世居京兆。韶幼而方雅。頗好奇節。在周累以軍功官至車騎大將軍。儀同三司。及平齊氏。封晉陽縣公。宣帝即位。拜豐州刺史。高祖受禪。進爵項城郡公。晉王廣之鎮并州也。除行臺右僕射。韶性剛直。王甚憚之。平陳之後。即鎮金陵。歲餘徵還。後秦王俊為并州總管。韶為長史。勞敝而卒。時年六十八。高祖甚傷惜之。趙仲卿。天水隴西人。父綱。周大將軍。仲卿性麤暴。有膂力。周

齊王憲甚禮之。從擊齊。攻臨秦。統戎威遠。伏龍張壁等五城。盡平之。又擊齊將段孝先於姚襄城。苦戰連日。破之。以功授大都督。尋典宿衛。平齊之役。以功遷上儀同。兼趙郡太守。高祖受禪。進爵河北郡公。開皇三年。拜石州刺史。遷兗州刺史。未之官。拜朔州總管。於時塞北盛興屯田。仲卿總統之事。多克濟。由是收獲歲廣。邊戍無饋運之憂。十七年。從高頴指白道。以擊達頭。仲卿率兵三千為前鋒。至族蠡山。與虜相遇。交戰七日。大破之。追奔至乞伏泊。復破之。虜千餘口。雜畜萬計。突厥悉衆而至。仲卿為方陣。四面拒戰。經五日。會高頴大兵。至合擊之。虜乃敗走。降者萬餘家。上命仲卿處之恒安。以功進位上柱國。明年督役築金河。定襄二城。以居啟民。時有表言仲卿酷暴者。上令御史王偉按之。並實。惜其功不罪也。煬

帝嗣位判兵部工部二曹尚書事其年卒時六十四
周法尚字德邁汝南安城人也高祖受禪拜巴州刺史賜帝
嗣位轉雲州刺史後三歲轉定襄太守時帝幸榆林法尚朝
於行宮內史令元壽言於帝曰漢武出塞旂旗千里今御營
之外請分為二十四軍日別遣一軍發相去三十里旗幟相
望鉦鼓相聞首尾連注千里不絕此亦出師之盛者也法尚
曰不然兵亘千里動間山川卒有不虞四分五裂腹心有事
首尾未知道阻且長難以相救雖是故事此乃取敗之道也
帝不懌曰卿意以為如何法尚曰結為方陣四面外距六宮
及百官家口並住其間若有變起當頭分抗內引奇兵出外
奮擊車為壁壘重設鉤陳此與據城理亦何異臣謂牢固萬
全之策也帝曰善因拜左武衛將軍

魚俱羅馮翊下邳人身長八尺膂力絕人聲氣雄壯言聞數
百步揚素率兵將出靈州道擊突厥路逢俱羅大悅遂奏與
同行及遇賊俱羅與數騎奔擊瞋目大呼所當皆披靡出左
入右往返若飛以功進位柱國拜豐州總管初突厥數入境
為寇俱羅輒擒斬之自是突厥畏懼屏跡不敢畜牧於塞上

↑
唐

張長遜京兆櫟陽人精馳射在隋為里長以平陳功擢上開
府累遷五原郡通守遭亂附突厥突厥號為割利特勒義兵
起以郡降即拜五原太守安化郡公徙封范陽時梁師都薛
舉請突厥兵南渡河長遜矯作詔與莫賀咄設以伐其謀會
唐使亦至突厥兵不出武德元年詔右武侯驃騎將軍高世
靜聘始畢可汗至豐州而始畢死詔留金幣不遣突厥怒引

兵南至河。長遜遣世靜出塞勞之。且若專致賻賜者，虜引還。授總管。改揚國公。及討薛舉，不待命，輒引兵會，賜錦袍、金甲。或譖長遜居豐久，恐與突厥為唇齒，乃請入朝。授右武侯將軍。徙息國公。歷遂、夔二州總管。政以惠稱。貞觀十一年卒。程務挺，洺州平恩人，少從父征討，以勇力聞。拜右領軍衛中郎將。破突厥六萬騎於雲州。會偽可汗阿史那伏念叛，詔裴行儉討之。以務挺副檢校豐州都督。伏念降，遷務挺右武衛將軍，封平原郡公。嗣聖初，與右領軍大將軍張虔勗等豫廢中宗，立豫王為皇帝。累被褒賚。以左武衛大將軍為單于道安撫大使。禦突厥，務挺善綏禦士，服其威愛。突厥憚之，不敢盜邊。

田仁會，雍州長安人。擢制舉仕，累左武侯中郎將。太宗征遼

東而薛延陀以數萬騎掩河內。詔仁會與執失思力率兵擊
敗之。尾逐數百里。幾生得延陀。璽書嘉慰。永徽中。為平州刺
史。五遷勝州都督。境有風賊。依山剽行人。仁會發騎捕格夷
之城門。夜開道。無寇跡。八為太府少卿。遷右金吾將軍。轉右
衛將軍。以年老乞骸骨。卒年七十八。諡軍威。

王方翼。字仲翔。并州祁人。太宗擢右千牛。高宗立。調安定令。
裴行儉討遮旬。奏為副兼檢校安西都護。西域平。以功遷夏
州都督。屬牛疫。民廢田作。方翼為耦耕法。張機鍵。力省而見
功多。百姓順賴。武后時。王后屬無在者。方翼自視功多。冀不
坐。而后內欲因罪除之。未得也。及務挺被殺。即并坐。方翼追
入朝。捕送獄。流崖州。卒于道。年六十三。神龍初。復官爵。方翼
善書。與魏叔琬齊名。

崔智辯。豐州都督。突厥入寇。戰死。
婁師德。字宗仁。鄭州原武人。第進士。授江都尉。天授初。以軍
功累授左金吾將軍。兼檢校豐州都督。知營田事。衣皮袴。率
士屯田。積穀數百萬。兵以饒給。無轉餉和糴之費。武后降書
勞之。長壽元年。召授夏官侍郎。同平章事。封譙縣子。聖曆二
年。突厥入寇。復令檢校并州長史。仍充天兵軍大總管。九月
卒于會州。年七十。贈涼州都督。諡曰貞。
唐璿。字休璟。以字行。京兆始平人。少以明經擢第。調露中。將
兵擊破突厥於獨護山。超拜豐州司馬。永淳中。突厥圍豐州。
都督崔智辯戰死。朝議欲罷豐州。保靈夏。休璟以為不可。上
疏。詳陳利害。高宗從其言。景雲初。以特進為朔方行軍大總
管。延和元年。卒。年八十六。贈荊州大都督。諡曰忠。

張仁愿。華州下邳人。有文武才。則天時。為并州都督。長史神龍三年。朔方軍總管沙吒忠義為突厥所敗。詔仁愿攝御史大夫。代忠義統衆。仁愿至軍。而賊衆已退。乃躡其後。夜掩襲其營。破之。始朔方軍與突厥以河為界。北厓有拂雲神祠。突厥將入寇。必先詣祠祭。酹求福。因牧馬料兵。而後渡河。時突厥默啜盡衆西擊突騎施。娑葛仁愿請乘虛奪取漠南之地。於河北築三受降城。首尾相應。以絕其南寇之路。太子少師唐休璟以為兩漢以來。皆北守黃河。今於寇境築城。恐勞人費功。終為賊虜所有。建議以為不便。仁愿固請不已。中宗竟從之。仁愿表留年滿鎮兵。以助其功。時咸陽兵二百餘人逃歸。仁愿盡擒之。一時斬於城下。軍中股慄。役者盡力。六旬而三城俱就。以拂雲祠為中城。與東西兩城相去各四百餘里。

皆據津濟。遙相應接。其北皆大磧也。拓地三百餘里。於牛頭
朝那山北。置烽候一千八百所。自是突厥不得度山放牧。朔
方無復寇掠。減鎮兵數萬人。仁愿初建三城。不置壅門。及郤
敵戰格之具。或問曰。此邊城禦賊之所。不為守備。何也。仁愿
曰。兵貴在攻。取不宜退。守寇若至此。即當併力出戰。迴顧望
城。猶須斬之。何用守備。生其退恧之心也。其後常元楷為朔
方軍總管。始築壅門。以備寇。議者以此重仁愿而輕元楷焉。
景龍二年。拜左衛大將軍。同中書門下三品。累封韓國公。春
還朝。秋復督軍備邊。中宗賦詩祖餞。賞賜不可勝紀。尋加鎮
軍大將軍。睿宗即位。以老致仕。開元二年卒。贈太子少傅。仁
愿為將。號令嚴。將吏信服。按邊撫師。賞罰必值功罪。後人思
之。為立祠。受降城。出師輒享焉。

王暎。滄州景城人。徙家於洛陽。弱冠。明經擢第。開元二年。以大破吐蕃功。封清源縣男。進并州大都督府長史。明年。突厥默啜為拔曳固所殺。其下多降。分置河曲。暎上疏言宜置內地。不然者。且必有變。疏奏未報。而虜已叛。乃敕暎將并州兵濟河以討之。暎間行。卷甲捨幕。趨山谷。夜遇雪。恐失期。誓於神曰。暎事君不以忠。不討有罪。天所殛者。當自蒙罰。士衆無罪。心誠忠。而天監之。則止。雪反風。以獎成功。俄而和霽。時叛胡分二道走。暎自東道追及之。獲級三千。以功遷左散騎常侍。朔方行軍大總管。改御史大夫。時跌跌部及僕固都督勺磨等潛引突厥內擾。暎密言上。盡誅誘而誅之。拜兵部尚書。復為朔方軍大總管。九年。封清源公。後坐貶梓州刺史。改太子詹事。中山郡公。進吏部尚書。太原尹。代張說為兵部尚書。

同中書門下三品充朔方軍節度大使河北河西河東隴右
之軍盡屬是冬以黨王喬坐貶鄆州刺史遷定州復以戶部
尚書為朔方軍節度使卒贈尚書左丞相予諡曰忠烈
張說字道濟開元七年檢校并州大都督府長史兼天兵軍
大使攝御史大夫兼修國史仍齎史本隨軍修撰八年秋朔
方大使王峻誅河曲降虜阿布思九姓同羅拔曳固等部落
皆懷震懼說率輕騎二十人持旌節直詣其部落宿于帳下
召首帥以慰撫之副使李憲以為夷虜難信不宜輕涉不測
馳狀以諫說報書曰吾肉非黃羊必不畏喫血非野馬必不
畏刺士見危致命是吾效死之秋也於是九姓感義其心乃
安九年四月叛胡與黨項攻銀城連谷以據倉糧說統馬步
萬人出合河關掩擊大破之拜兵部尚書明年又勅說為朔

方節度大使。往巡五城。處置兵馬。時降胡康願子反。說討擒之。於是移河曲六州。殘胡五萬餘口。配唐鄧仙。豫間。空河南朔方地。奏罷邊鎮兵二十餘萬。還農。前後三秉大政。開元十八年十二月卒。年六十四。贈太師。諡曰文貞。

王忠嗣。太原祁人。以父死王事。賜名忠嗣。養於禁中。及長。試守代州別駕。開元二十八年。充河東節度使。二十九年。代韋光乘為朔方節度使。天寶元年。兼靈州都督。是歲北討奚怒。皆敗之。築大同。靜邊二城。徙清塞。橫野軍實之。併受降。振武一城。自朔方至雲中。緣邊數千里。當要害地。開拓舊城。或自創制。斥地各數百里。自張仁亶之後。四十餘年。忠嗣繼之。北塞之人。復罷戰矣。五年正月。忠嗣以特節。充西平郡太守。判武威郡事。充河西隴右節度使。其月。又權知朔方。河東節度使。

事忠嗣佩四將印。控制萬里。勁兵重鎮。皆歸掌握。自國初已來。未之有也。

郭子儀華州鄭縣人。始以武舉高等補左衛長史。累遷單于副都護。振遠軍使。天寶八載。木刺山始築橫塞軍。及安北都護府。命子儀領其使。拜左衛大將軍。十三載。移橫塞軍。及安北都護府於永清柵北。築城。仍改橫塞衛為天德軍。子儀為之使。兼九原太守。朔方節度右兵馬使。十四載。安祿山反。十一月。以子儀為衛尉卿兼靈武太守。充朔方節度使。詔子儀以本軍東討。遂舉兵出單于府。收靜邊軍。斬賊將周萬頃。傳首闕下。祿山遣大同軍使高秀巖寇河曲。子儀擊敗之。進收雲中馬邑。開東陁。以功加御史大夫。後以收復兩京功。加司徒。封代國公。德宗即位。詔攝冢宰。賜號尚父。進位太尉。中書

令柱國汾陽郡王。建中二年六月十四日薨。時年八十五。諡曰忠武。

李光弼。營州柳城人。天寶十一載。拜單于副都護。祿山之亂。郭子儀為朔方節度。薦光弼。堪閩寄十五載。正月。為雲中太守。攝御史大夫。充河東節度副使。知節度事。二月。轉魏郡太守。河北道採訪使。以朔方兵五千。會郭子儀軍。東下井陘。收常山郡。擊破賊將史思明。會潼關失守。乃拔軍入井陘。肅宗理兵於靈武。遣使追赴行在。授戶部尚書兼太原尹。北部留守。同中書門下平章事。至德二年。大破賊將史思明。乾元二年七月。制拜天下兵馬副元帥。知節度行營事。八月。加太尉兼中書令。代郭子儀為朔方節度兵馬副元帥。十月。復破史思明於河陽。以功進爵臨淮郡王。廣德二年七月。薨於徐州。

時年五十七。贈太保。諡曰武穆。

渾瑊。臯蘭州人。本鐵勒九姓之渾部。父釋之。從朔方軍。積戰
功於邊上。廣德中。與吐蕃戰。沒瑊。善騎射。勇冠諸軍。署折衝
果毅。破阿思布部。又與諸軍城永清。及天安軍。遷中郎將。肅
宗即位。瑊以兵趨行在。敗虜軍於天德。大曆中。回紇侵太原。
破鮑防軍。拜瑊都知兵馬使。虜引去。進兼單于副都護。振武
軍使子儀為太尉。德宗析所部為三節度。以瑊兼單于大都
護。振武東受降城。鎮北大都護府。綏銀麟勝州節度副大使。
興元元年。論收京城之功。封咸寧郡王。九月。又加朔方行營
兵馬副元帥。貞元元年。討平李懷光。以功加檢校司空。貞元
四年。進檢校司徒。兼中書令。十五年卒。年六十四。贈太師。諡
曰忠武。

范希朝字致君河中虞鄉人貞元四年遷振武節度使加檢校禮部尚書振武有党項室韋交居川阜凌犯為盜日入慝作謂之刮城門居人懼駭鮮有寧日希朝於要害置柵堡斥候嚴密人遂獲安雖鼠竊狗盜必殺無赦戎虜甚憚之曰有張光晟苦我久矣今聞是乃更姓名而來其見畏如此蕃落效奇駝名馬一無所受積十四年虜皆保塞不敢橫單于城中舊少樹希朝於他處市柳子命軍人種之俄遂成林居人賴之憲宗即位充朔方靈鹽節度使遷河東節度使元和九年卒贈太子太師

李景畧幽州良鄉人曆末客河中闔門讀書李懷光為朔方節度使署巡官五原將張光殺其妻以貨市獄前後不能決景畧覈實論殺之遷大理司直後塞下傳言回紇將南寇中

尉竇文場言豐州當得良將。且舉景略。乃拜豐州刺史。天德
軍西受降。城都防禦使窮塞苦寒。地墦鹵。邊戶勞悴。景畧至。
節用約己。與士同甘。蓼鑿咸應。永清二渠。溉田數百頃。儲粟
器械畢具。威令肅然。聲雄北疆。回紇畏之。卒於屯。年五十五。
天下惜用。景略才有所未盡。贈工部尚書。
任迪簡。京兆萬年人。舉進士。為天德軍使。李景畧判官。性重
厚。嘗有軍宴。行酒者誤以醯進。迪簡知誤。以景畧性嚴。慮坐
主酒者。乃勉飲盡之。而偽以酒薄。白景畧。請換之。於是軍中
皆感悅。及景畧卒。衆以迪簡長者。議請為帥。監軍使聞之。拘
迪簡於別室。軍衆連呼而至。發戶扃。取之。表聞。德宗使察馬。
具以軍情奏。除豐州刺史。天德軍使卒。贈刑部尚書。諡曰襄。
劉沔。許州牙將也。少事李光顏。為帳中親將。元和末。光顏討

吳元濟常用沔為前鋒。沔驍銳善騎射。每接戰。必冒刃陷堅。俘馘而還。故忠武一軍破賊第一。淮蔡平。隨光顏入朝。憲宗留宿衛。曆三將軍。歷鹽州刺史。天德軍防禦使。在西北邊累立奇效。太和末。河西党項羌叛。沔以天德之師。屢誅其首渠。移授振武節度使。檢校右散騎常侍。單于大都護。開成中。党項雜虜大擾河西。沔率吐渾契苾沙陀三部落等諸族萬人。馬三千騎。徑至銀夏。討擊大破之。俘獲萬計。告捷而還。以功加檢校戶部尚書。會昌初。迴紇部飢。烏介可汗奉太平公主至漠南求食。過杞頭峯。犯雲朔北川。朝廷乃移沔河東節度使。檢校尚書左僕射。太原尹。北京留守。詔與幽州張仲武協力招撫。迴紇竟破虜寇。迎公主還宮。以功進位檢校司空。五年。罷為太子太保。明年致仕。卒。年六十五。

案新唐書劉沔傳謂沔父廷珍官左驍衛大將軍封東陽郡王沔少孤客振武節度使范希朝署為牙將捉刀立堂下希朝奇之於舊唐書劉沔傳所叙少事李光顏事隻字未提差異甚大然則新舊二書之文果誰為是乎考沔卒於會昌六年得年六十五由是年逆數之知沔出生於德宗建中四年而范希朝之遷為振武節度在德宗貞元四年此時沔僅六歲何能任牙將捉刀立堂下乎此必宋祁修新唐書時誤以他人之事為沔事也况沔如是東陽郡王之子雖少孤何至六齡稚子即遠客塞上此太不近人情故本志捨新書而用舊書以其較可信耳例如舊書謂元和末沔從李光顏平淮蔡事在元和十二年此時沔已三十五歲正當壯盛之年立功疆場不亦宜乎

石雄。徐州人。少為牙校。敢毅善戰。太和中。党項擾河西。召雄。隸振武。劉沔軍為裨將。破羌有勞。會昌初。回鶻入寇。連年掠雲朔。牙五原塞下。詔雄為天德防禦副使。兼朔州刺史。佐劉沔屯雲州。沔召雄謀曰。虜離散當掃除久矣。國家以公主故。不欲亟攻。我若徑趨其牙。彼不及備。必棄。公主走。我當迎。主歸。有。如。不。捷。吾。則。死。之。雄。曰。諾。即。選。沙。陀。李。國。昌。及。契。苾。拓。拔。雜。虜。三。千。騎。夜。發。馬。邑。旦。登。振。武。城。望。之。見。罽。車。十。餘。乘。從。者。朱。碧。衣。謀。者。曰。公。主。帳。也。雄。潛。使。喻。之。曰。天。子。取。公。主。兵。合。第。無。動。雄。穴。城。夜。出。縱。牛。馬。鼓。譟。直。擣。烏。介。帳。可。汗。大。駭。單。騎。走。追。至。殺。胡。山。斬。首。萬。級。獲。馬。牛。羊。不。貲。迎。公。主。還。進。豐。州。防。禦。使。宣。宗。立。徙。鎮。鳳。翔。拜。神。武。統。軍。卒。

高霞寓。范陽人。元和五年。以左威衛將軍從吐突承璀擊王

承宗加左散騎常侍。明年改豐州刺史。三城都團練防禦使。
六遷至檢校工部尚書。元和十三年出為振武節度使。會吐
蕃攻鹽豐二州。霞寓以兵五千屯拂雲堆。虜引去。浚金河。溉
鹵地數千頃。寶歷中。疽發首。卒。贈太保。
史憲忠字元貞。憲誠弟也。少為魏牙門將。大中初。突厥擾河
東。鈔漕米行賈。徙節振武軍。于是故帥荒沓使游奕兵覘戎
有良馬牛。彊取之。歸。值十一戎人怒。因興盜掠。憲忠廉儉。少
所欲。嘗曰。吾居河朔。去此二千里。乃乘五健馬。今守邊。發吾
餘俸。不患無馬。何忍豪市哉。故所至莫不懷德。累封北海縣
子。檢校尚書左僕射。卒。贈司空。
韋宙京兆萬年人。丹子。宣宗時拜侍御史。三遷度支郎中。盧
鈞節度太原表宙為副。是時回鶻破諸部入塞。下剽殺吏民。

鈞欲得信重吏視邊。宙請往。自定襄、雁門、五原、絕武州塞。畧雲中。踰句注。徧見酋豪。鑄諭之。視亭障。守卒增其稟。約吏不得擅以兵侵諸戎。犯者死。於是三部、六蕃諸種皆信悅。累官嶺南節度。同平章事。咸通中卒。

案本志。舊稿於唐人仕績。不取大曆。建中之際。振武節度使張光晟。蓋以其晚節不全。嘗污於朱泚偽命故也。然其在鎮所為。頗有可稱者。茲補錄之。以充鄉邦。历史舊聞。考舊唐書。張光晟。京兆。蓋屋人。大曆末。遷單于都護。兼御史中丞。振武軍使。代宗密謂之曰。北蕃縱橫日久。當思所禦之計。光晟既受命至鎮。威令甚行。建中元年。迴紇突董梅錄領衆。并雜種胡等。自京師還國。輿載金帛。相屬於道。光晟訝其裝橐頗多。潛令驛吏以長錐刺之。則皆輦歸所誘。

致京師婦人也。遂給突董及所領徒悉令赴宴。酒酣光晟
伏甲盡拘而殺之。死者千餘人。唯留二胡歸國復命。遂部
其婦人給糧還京。收其金帛賞賚軍士。後迴紇遣使來訴。
上不欲甚阻蕃情。徵拜右金吾將軍。後以降朱泚罪不可
原。伏法。

五代

李嗣本。鴈門人。本姓張。少事武皇。為帳中紀綱。漸立戰功。得
補軍校。賜姓名。乾寧五年。從李嗣昭討王暉于雲州。論功加
檢校司空。遷代州刺史。六年。改雲中防禦使。雲蔚應朔等州
都知兵馬使。九年。周德威討劉守光。嗣本率代北諸軍生熟
吐渾收山後八軍。得納降軍使。盧文進武州刺史。高行珪以
獻幽州平。論功授振武節度使。號威信可汗。十三年。從莊宗

破劉鄩於故元城。收洛磁衛三郡。六月還鎮振武。八月契丹安巴堅傾塞犯邊。其衆三十萬。攻振武。嗣本嬰城拒戰者累日。契丹為火車地道。晝夜急攻。城中兵少。禦備罄竭。城陷。嗣本舉族入契丹。

案唐昭宗之乾寧年號。只有四年。即併光化。天復二號數之。亦僅得十年而已。無所謂乾寧五年。更無所謂十三年也。然則舊五代史謂李嗣本之入契丹。在乾寧十三年者。何耶。此蓋薛居正修舊史時。誤以天祐為乾寧耳。考歷代帝王年表。朱全忠於天祐元年八月弒昭宗而立昭宣帝。仍用天祐年號。至四年四月。朱全忠篡位。改國號為梁。改年號為開平。但晉王李克用不用梁號。而仍稱唐。天祐幾年。示不忘唐也。據遼史太祖本紀。遼兵之攻李嗣本。在神

冊元年而神冊元年乃梁末帝之貞明二年亦即晉王父子所用之唐天祐十三年也。誤天祐為乾寧此其證矣。又遼神冊五年十月攻天德癸酉節度使宋瑤降更其軍曰應天甲戌班師宋瑤復叛丙子拔其城擒宋瑤俘其家屬徙其民於陰山南此事雖甚簡略然亦鄉邦一舊聞也。故附識於此。

↑宋

曹光實雅州百丈人少武勇有胆氣輕財好施不事細行太平興國七年李繼捧獻銀夏綏宥四州以光實為銀夏綏麟府豐宥州都巡檢使繼捧弟繼遷逃入蕃落為邊害光實乘間掩襲至地斤澤俘斬甚衆破其族帳獲繼遷母妻及牛羊萬計繼遷僅免使人給光實曰我數奔北勢窘不能自存矣

公許我降乎。因致情款。陳甥舅之禮。期某日降於葭蘆川。光實信之。且欲專其功。不與人謀。及期。繼遷先設伏兵。令十數人近城。迎致光實。光實從數百騎往赴之。繼遷前導北行。將至其地。舉手麾鞭。而伏兵應之。光實遂遇害。卒年五十五。尹憲。并州晉陽人。開寶中。事太宗於藩邸。太宗即位。擢為殿直。充延州保安軍使。太平興國四年。護府州屯兵。與鄜州三族會攻嵐州。破敵千餘衆。擒偽知嵐州事馬延忠。拔緣河諸砦。以功轉西京作坊副使。入朔州界。破寧武軍。殺其軍使。獲人馬器甲甚衆。改護夏州兵。轉供備庫使。殺戮三汭醜奴莊。岌伽羅膩葉十四族。及誘其渠帥屢降。詔書褒美。雍熙初。詔就知夏州。攻破李繼遷之衆於地斤澤。繼遷遁走。俘獲四百餘帳。奏清於所部。抽移諸帳。別置騎兵。號曰平砦。以備其用。

詔從之。以疾卒。年六十三。

安守忠字信臣。并州晉陽人。宋初為左衛將軍。雍熙二年知

易州。徙夏州。每西戎犯邊。戰不捷。錄功。就拜濮州團練使。咸

平三年入覲。遣還。未行。暴卒。年六十九。

案宋初與李繼遷父子爭夏。麟宥諸州者。凡數十年。戰役

頻繁。互有得失。而地之屬宋屬李。亦無定局。當時宋人之

官。此土者。除上述三人外。尚有知麟州之衛居實。見於真

宗本紀。知豐州之王餘慶。見於仁宗本紀。惟因其事蹟無

多。故宋史未為立傳。茲但補錄其姓名而已。考宋史夏國

傳。雍熙四年。知夏州安守中。以三萬衆戰於王亭鎮。敗績。

繼遷追至城門而返。此不特與安守忠本傳之戰無不捷。

語有出入。即名字亦有守中守忠之異。第以雍熙年代覈

之實一人也。當以本傳之名字為是。又咸平六年，繼遷以二萬騎圍麟州。知州衛居實出奇兵突戰，絕勇士城下。城上鼓噪，矢石如注，殺傷萬餘人。繼遷乃拔去。此居實亦與真宗本紀之居實不同。當以本紀所載為是。至於所爭諸州之現今地址，則夏州在鄂爾多斯部右翼前旗界，宥州在右翼中旗界，麟州在右翼前末旗界，豐州在左翼前旗南界，皆今伊克昭盟轄境也。故列諸人於仕績，尚不違志。例外。

↑
遼

楊佖字正叔，南京人。幼穎悟，異常讀書，自能成句，識者奇之。弱冠，聲名籍甚。統和二十四年，舉進士第一。歷校書郎、大理正。重熙元年，陞翰林學士承旨。丁母憂，起復工部尚書。歷中

順軍節度使朔武等州觀察處置使天德軍節度使加特進
檢校太師同中書門下平章事其居相位以進賢為己任卒
有登瀛集行於世

耶律僕里篤字燕隱六院林牙突呂不也四世孫重熙十六
年知興中府以獄空聞十八年伐夏攝西南面招討使十九
年夏人侵金肅軍敗之斬首萬餘級加右武衛上將軍知金
肅軍事宰相趙惟節總領邊城橋道芻粟請貳帝命僕里篤
副之以稱職聞

耶律獨攔字胡獨堇太師古昱之子重熙初為左護衛將禁
兵從伐夏有功授十二行紕司徒再舉伐夏獨攔括山西諸
郡馬還遷拽刺詳穩西夏未平命獨攔知金肅軍事夏人來
侵擊敗之太康元年卒

耶律鐸軫字敵輦積慶宮人重熙間歷東路統軍使天德軍節度使十七年城西邊命鐸軫相地及造戰艦因成樓船百三十艘上置兵下立馬規制堅壯稱旨及西征詔鐸軫率兵由別道進會於河濱敵兵阻河而陣帝御戰艦絕河擊之大捷而歸親賜卮酒仍問所欲鐸軫對曰臣幸被聖恩得効駑力萬死不能報國又將何求帝愈重之手書鐸軫衣裾曰勤國忠君舉世無雙卒于官年七十

案遼史地理志金肅州重熙十二年伐西夏置割燕民三百戶防秋軍一千實之屬西南面招討司此盖用後魏金肅鎮之舊名而置為軍州也其地當在今托縣近河處

↑
金

郭企忠字元弼唐汾陽王子儀之後郭氏自子儀至承勳皆

節鎮北方。唐季承勳入於遼。子孫繼為天德軍節度使。至昌
金降為副使。企忠襲父官。加左散騎常侍。天輔中大軍至雲
中。遣耶律坦招撫諸部。企忠來降。軍帥命同勾當天德軍節
度使事。徙所部居於韓州。天會三年鎮代州。六年改靜江軍
節度。留後。遷天德軍節度使。累遷金吾衛上將軍。秩滿。權沁
州刺史。到官歲餘。卒。年六十八。

石抹元毅。本名神思。咸平府路。酌赤烈猛安。莎果歌仙。謀克
人也。以廢補吏部令史。再調景州寧津令。明昌初。改彰德府
治中。尋以邊警。授撫州刺史。會邊將失守。芻糧馬牛焚剽殆
盡。元毅率吏卒三十餘人出州。經畫軍餉。卒與敵遇。州倅暨
從吏堅請還。元毅曰。我輩責任邊守。遇敵而奔。其如百姓何。
縱得自安。復何面目對朝廷乎。遂執弓矢。令衆衆感其忠。爭

為效死。元毅力戰射無不中。敵去而復合。元毅氣愈厲。鏖戰久之。衆寡不敵。遂遇害。時年四十七。

完顏安國。字正臣。本名閣母。其先占籍上京。世有戰功。祖斜婆。授西南路世襲合札謀克。安國沉雅有謀畫。尤善騎射。正隆元年。從軍為謀克。常以少擊衆。大定中。為常山簿。轉虹縣令。遷儀鸞局副使。明昌元年。改本局使。會大石部有乞修歲貢者。朝廷許其請。詔安國往使之。既還。以奉使稱旨。升武衛軍都指揮使。出為東北路副招討。未赴。改西北路副招討。六年。左丞相夾谷清臣出兵。以安國為先鋒都統。以功遷本路招討使。兼威遠軍節度使。承安元年。大鹽澤之戰。殺獲甚衆。既而右丞相襄總大軍進安國為兩路都統。大捷於多泉子。襄遣安國追敵。僉言糧道不繼。不可行也。安國曰。人得一羊。

可食十餘日。不如驅羊以襲之便。遂從其計。安國統所部萬人疾驅以薄之。降其部長。捷聞。進官四級。二年以營邊堡功。召簽樞密院事。賜虎符。還邊。泰和元年。特授世襲西南路延晏河猛安兼合扎謀克。帝幸慶寧宮。命安國嚴飭邊備。奏西南路邊戍私竄者。乞招誘以安人心。上是其言。三年以疾致仕。封道國公。四年起復前職。卒。

案金朝人物之仕於今綏遠省境者。據金史所載。尚有梁襄字公贊。絳州人。嘗任東勝州刺史。烏古論仲溫。本名胡刺。亦嘗任東勝州刺史。張焯字子明。洺州永年人。嘗任桓州刺史。田灝字默之。興中人。嘗任振武軍節度使。張翰字林卿。忻州人。曾任東勝縣令。此諸人在職時事績無多。故但記其姓名於此足矣。桓州在今興和縣界。下有威遠軍。

節度使撫州在今集寧縣界下有鎮寧軍節度使。

↑元

劉伯林濟南人。好任俠，善騎射。金末為威寧防城千戶。壬申歲，太祖圍威寧，伯林知不能敵，乃縋城詣軍門請降。太祖許之，遣禿魯花等與偕入城，遂以城降。帝問伯林在金國為何官，對曰：「都提控。」即以元職授之，命選士卒為一軍，與太傅耶律禿懷同征討。招降山後諸州，太祖北還，留伯林屯天成。遏金兵前後數十戰，進攻西京，錄功賜金虎符。以本職充西京留守，兼兵馬副元帥。乙亥，同國王木華黎攻破燕京。在威寧十餘年，務農積穀，與民休息，隣境凋瘵，而威寧獨為樂土。嘗曰：「吾聞活千人者，後必封。吾之所活，何啻萬餘人，子孫必有興者乎？」辛巳，以疾卒。年七十二。

李德輝字仲實通州潞縣人天性孝悌操履清慎既就外傳嗜讀書束於貧無以自資乃輟業年十六監酒豐州祿食充足甘旨有餘則市筆札錄書夜誦不休已乃厭糟麴歎曰志士顧安此耶仕不足以匡君福民隱不足以悅親善身天地之間人壽几何惡可無聞同腐草木也乃謝絕所與游少年求先生長者講學以卒其業

賈搏霄不知何許人太祖西征留鎮雲內築除戎堂於城之西阿以練戎事又築西庵於廳事以舍沙門建歸一堂置三聖廟貌耶律楚材嘗作詩讚其勲德

案賈搏霄新舊元史皆無傳惟耶律楚材湛然居士集亟稱之則亦元初之名宦也特事績太少而好崇獎沙門蓋與耶律楚材李純甫輩同屬佞佛之人不足多述也

↑明

黃里字德隣。浙江山陰人。從王冕學。春秋三傳。工詩詞。洪武初舉明經。授雲內州同知。洪武五年秋。蒙古兵突入城。里率兵巷戰。力屈死之。

案明初雖嘗掩有東勝雲內二州及天成縣地。但不久即廢州縣而置衛。所謂東勝五衛及雲川玉林天成諸衛也。至永樂初。諸衛皆徙入邊內。而塞北之城堡悉廢。於是邊外之地盡入於蒙古。而明朝之縉紳終明之世無復出塞筮仕之可能矣。故本篇於明人所取絕少。得一黃里真鳳毛麟角也。

↑清

費揚古。棟鄂氏。滿州正白旗人。父鄂碩。為國勲戚。封三等伯。

費揚古狀貌魁異。年十四襲父爵。康熙十三年從安親王岳樂討吳三桂。十八年敗吳國貴於武岡。師還擢領內侍衛大臣。二十九年參贊裕親王福全軍事。擊敗噶爾丹於烏蘭布通。三十二年歸化城增戍兵。以費揚古為安北將軍駐城。一日立營未久。民捉一兵至。訴入渠家。調其婦。公問被污乎。曰未也。公拔一刀與之。曰今甫立營。斬之不祥。如再敢往。即將此刀斬之。民與兵皆扣頭去。後作先鋒衝虜陣者。即此兵也。三十三年五月。噶爾丹使人至歸化城。言欲入貢。費揚古偵其踵至者。男女幾二千人。遣兵迎問。且止之。七月聞噶爾丹將偪圖拉。詔同右衛將軍希福率兵往禦。希福請益兵。上責希福遇事疑沮。令勿偕往。諭大學士曰。費揚古勲舊大臣。今駐歸化城。軍民皆心服。於此事無不能辦也。尋以圖拉無警。

慮噶爾丹將趨歸化城。詔費揚古旋師，復駐歸化城。三十四年十月，授右衛將軍，兼管歸化城將軍事。時歸化城商販初集，蒙古兵弁強攫貨物，有索價者，輒依勢凌暴，商民苦之。公至，力除其弊，有犯者，即懲以法。十一月，授撫遠大將軍，召入覲，授方略。三十五年，從征厄魯特，凱旋，以軍功進爵一等公。仍管撫遠大將軍事。昭璉嘯亭雜錄載：方師次歸化城時，公從聖祖皇帝之番僧寺，番僧中號為活佛者，見上，傲睨不為禮。公即揮刃斬之，上尤其鹵莽。公徐奏曰：番僧雖貴，亦人臣也。豈可使無禮於君前，亂我國法？使有異術，臣抽刀時，應早令伽藍按捺，不延頸就戮矣。扈從者爭服其言。自此番僧見大皇帝，彌益恭順。三十七年二月，奉命還京師，塞外軍民商賈立祠以祀。至今香火弗替。

傅良富察氏滿州鑲黃旗人大學士馬齊子雍正三年襲騎
都尉世職乾隆十四年晉爵一等伯兼一雲騎尉二十八年
四月擢歸化城都統尋因缺裁命以都統銜仍留吉林副都
統任三十三年四月授綏遠城將軍奏稱駐防筆帖式調補
武職者例須滿六年後方可選補本翼驍騎校而候補筆帖
式反於本翼驍騎校出缺時即與領催前鋒等揀選補授殊
屬不均請嗣後隨印筆帖式屆三年時勤慎能事者遇本翼
驍騎校缺出一體揀選其尋常供職者仍照六年例辦理下
軍機大臣議行三十四年調吉林將軍
吉富克勒特氏蒙古鑲黃旗人由親軍擢陞御前侍衛乾隆
二十九年授歸化城副都統任內多所建白三十一年七月
奏稱喜峯口監督兼理歸化城姓隻稅務鞭長莫及請由理

藩院派章京一員駐歸化城辦理。又疏言歸化城旗民雜處。事務繁多。若統歸綏遠城將軍辦理。轉多掣肘。請頒給副都統印辦事。較為簡易。得旨均如所請。行。八月。調察哈爾都統。四十九年。陞綏遠城將軍。五十一年。調寧夏將軍。

宗室慶怡。正藍旗人。乾隆四十九年。封三等輔國將軍。五十

二年。襲奉恩輔國公爵。任散秩大臣。五十七年。遷歸化城副

都統。嘉慶七年。擢廣東廣州將軍。尋以疾回京。十一年。九月。

左遷宗人府右宗人。十二年。六月。偕鴻臚寺卿文孚來歸化

城。審辦土默特驍騎校旺當及披甲人巴彥色楞呈控綏遠

城將軍春寧及參領棍楚克受賄營私各款。惟棍楚克賭博

宿娼屬實。餘坐誣擬罪如律。七月。署歸化城副都統。九月。兼

署綏遠城將軍。尋以前任將軍春寧山西巡撫成寧奏請將

綏遠廳屬之渾津黑河等處地畝。改徵折色。其不敷支放兵糧米石。請將大青山馬廠餘地。招墾補額。上命慶怡等就近詳查履勘。奏言查渾津黑河共莊頭十三戶。渾津十戶。黑河三戶。每戶原認種地六十頃。嘉慶四年渾津莊頭呈報地畝。鰥壞。經前任將軍永慶奏准豁免餘地一百八十餘頃。其餘五百九十餘頃。各莊頭仍舊交糧分種。九年間莊頭等復以該處地畝生鰥。呈請改徵折色。經將軍春寧等具奏。屢經部議。見在逐細履勘。約略牽合計算。有鰥者不過十分之一二。若因此一二分鰥地。並將無鰥之地。改徵折色。不惟見在不敷兵糧。抑且腴鰥混淆。不足以昭平允。應請按地認真覈計。其實係生鰥不堪種藝之區。即與開除。其並無鰥之區。仍令照舊交糧。毋許妄生覬覦。如此辦理。則所短兵米無幾。易於

籌補。即將馬牧開種。亦屬招墾無多。不致有礙游牧。至大青
山八旗馬廠地面遼廓。恐招墾以後。無業游民趨利若鶩。甚
至引類呼朋。逐漸偷開。招之易而驅之難。請將從前奏准開
墾六千餘頃。並此次奏開若干頃外。查明未開草地頃數。各
按四至地界。堆立鄂博。或挖壕塹。嚴禁偷開。並造冊送部備
案。庶兵糈足敷支用。而馬廠尚留餘俾。資牧放下部議行。
蒙民交便。八月調察哈爾八旗都統。
松筠。字湘浦。瑪拉特氏。蒙古正藍旗人。嘉慶二十三年十月。
署綏遠城將軍。先是烏喇特中公旗扎薩克車楞旺楚克多
爾濟。重斂苛虐。其下經協理合吉圖斯拉克齊車楞敦多克
密都布等七十餘人。聯名訐告。正盟長西公旗扎薩克巴圖
鄂齊爾副盟長東公旗扎薩克克拉特那巴拉積不能容。公廉

得其情。奏削中公札薩克印。正盟長交理藩院議處。其印改
派副盟長拉特那巴拉代理。道光十二年七月。又奉命往歸
化城查辦達爾漢茂明安土默特三旗爭地案。逐處履勘。添
設堆記鄂博各清界址。永杜爭端。奏上從之。十二月。授理藩
院左侍郎。十三年。調工部左侍郎。十四年。命以都統銜休致。
十五年卒。年八十二。諡文清。

宗室來儀。正藍旗人。乾隆二十九年。授三等侍衛。嘉慶十二
年。由鑲黃旗蒙古副都統陞任。綏遠城將軍。十三年。同山西
巡撫成寧奏稱。遵旨勘明綏遠廳渾津黑河生釀莊田。應豁
免米石及大青山後木廠餘地。招民開墾。試種升科。經戶部
議准。得旨允行。十五年。奏稱歸化城沙拉穆楞牧廠。復被民
人私墾。種地民人為數較多。居住已非一載。若一律驅逐。燬

其廬舍未免窮無所歸請照乾隆二十九年升科之例免其
驅逐將所徵銀兩量為變通為該處喇嘛蒙古等香火養贍
之資奏入諭以向來游牧地方民人私墾地畝往往以閱日
既久礙難驅逐日後勿許以再添為詞竟成故套若不實力
查辦或致驅而復集數年後仍不過如此聲請則查禁俱屬
具文着該將軍副都統飭屬各往各村詳加查點毋任再添
一户再墾一畝並着議定章程示以限制儀等尋奏見在私
墾民人免其驅逐擬照保甲之法編列牌頭甲長保正責令
互相首報諭曰編查保甲行之内地籍以稽查賊盜而地方
官視為具文尚屬有名無實該處游牧之所蒙古地方向未
設立保甲今該將軍等因查禁私墾民人做照辦理亦屬籌
辦一法惟是此等民人原應於闕隘交界處豫為嚴禁毋令

濫行偷越。若專責成保甲稽查。恐日久奉行不力。仍屬空言。該將軍等既有此奏。即著妥為經理。仍嚴飭地方官及守口弁兵。遵照舊例。遇有出口民人。如係隻身驗票放行。其攜眷之戶。概行禁止。十六年閏三月。因兩耳重聽。調京署理正白旗漢軍都統。尋以原品休致。二十一年卒。八十六那拉氏。滿州鑲白旗人。西安駐防。由馬甲積功。於嘉慶十六年授青州副都統。二十三年十一月。擢綏遠城將軍。十二月。偕欽差大臣禮部尚書松筠歸化城。副都統博卿阿奏請於毘連大青山之蒙古安設卡倫。以資巡緝。並嚴定台吉佐領等承緝處分。嚴飭西勒圖呼圖克圖所屬沙畢那爾僧俗人等。毋許窩留賊犯。及商民被劫。呈報過遲。分別責懲。查無憑據者。不為准理。各章程疏入。下所司議行。官民便之。尋調廣州將軍。

昇寅字賓旭號晉齊滿州鑲黃旗人嘉慶庚申舉人歷官至
都察院左都御史禮部尚書晉贈太子太保予諡勤直道光
十年官綏遠城將軍時邊塞無事惟春秋按時訓練不使駐
防軍士倚勢欺壓商民在任僅年餘阮文達公元作年譜序
畧謂公之學以勇於行為務其餘於吏事無不諳其施之於
政無不斷所至卻苞苴絕請託故無所阻撓暇則出入經史
以補其所不足當奉使命崎嶇道路間讀書聲時入人耳詩
文俱有寄託不以流連光景見長著有使喀爾喀紀程草皇
華草晉齋詩草行世

定安字靜村滿州鑲藍旗人同治七年任綏遠將軍時河西
一帶寇氛日熾羽檄交馳公籌餉練兵調遣各營部署守禦
軍聲大震寇聞風去繼而修城濬隍復於城外衢旁遍植樹

木至今比之蘇公堤云。改八旗飲助章程。使婚喪咸以其時。每遴官選兵一秉大公。尤加意於人才。籌款築長白書院。規模大備。復集捐數千金。藉權子母。以為肄業者膏獎之需。又為八旗立義塾二十餘所。嚴定課程。綏之文風一振。慶春滿州正黃旗人。光緒初年蒞綏。遠將軍任性廉介。自奉儉約。於常祿外一介不取。惟時大青山匪徒倡亂。民心惶惑。公不動聲色。密運戎機。賊偵知有備。相率渡河。而西民賴以安。尤能體恤士子。捐集鉅款。以為鄉會試賓興之需。文教武畧至今人艷稱之。

宗室瑞聯。字睦庵。壬戌翰林。由察哈爾都統。於光緒三年任綏遠將軍。於整軍經武之餘。尤加意文學。因前將軍定安所建長白書院。改為啟秀書院。奏明立案。每逢月課。必臨院親

閱試卷為士子口講指畫歷數年不倦。又倡捐鉅款添膏火二十餘分用資獎勵士林甚愛戴之。貽穀字藹人烏雅氏滿州鑲黃旗人光緒十八年進士歷官兵部左侍郎二十八年奉命督辦蒙旗墾務駐節綏遠旋加理藩部尚書銜明年復授綏遠城將軍事權統一銳意圖功。東起張家口西迄甘邊套地墾區凡數千里分東墾西墾兩部籌辦之始當庚子大祲後晉省庫帑支絀難資展布乃奏設東西兩路墾務公司集官商股款經始其事開放察哈爾左右兩翼荒地清理私墾熟地革除歷年地商戶總把持積弊清釐地戶鞫鞫訟爭數百起東墾略竣西墾繼興綏屬全蒙庚子教案以次辦結三十一年後套八大渠收歸官辦修濬招墾水利大興兩盟各旗亦陸續報墾又開綏遠城八旗

牧廠地。試辦屯墾。放殺虎口台站地。清釐土默特旗地。贖四子王各旗賠教地。前後辦墾六年。計西墾放地七萬餘頃。歲收租課銀數萬兩。永租歲至十萬兩。統收押荒地價銀二百七十餘萬兩。闢地既廣。增設廳治。光緒二十九年。置興和陶林五原武川三十一。年置東勝。合諸舊治。有十二廳。邊民生聚。至光緒末年。稱為極盛。已樹後日分區建省之規模矣。至綏遠城旗務。建樹亦多。練陸軍興學校。籌集旗丁生計鉅款。修濬綏遠城隍甫任軍篆。即革除陋規。公費節擲虛耗。以濟要需。三十四年春。被劾查辦。逮問三年。獄不決。久之論戍四川甫就道。值辛亥民軍起義。道梗不行。安置易州。居白楊村者十餘年。未嘗入城市。民國十年。大總統徐世昌。明令昭雪。沉寃。特予賜匾褒揚焉。綏遠文化晚開。向無志乘。貽穀在任。

時延寧河高賡恩纂輯綏遠土默特旗兩志均刊行復主修
歸綏道志稿甫脫而參案起竟未及付刊並著有綏遠奏議
墾務奏議等書凡所敷陳皆屬安邊要略規畫久遠後官斯
土者多資借鏡云

墾岫北京旗籍宣統三年三月授綏遠城將軍是年秋山西
民軍起義歸綏境內軍務繁興奸徒游勇乘機結衆擾動綏
東之豐陶綏西之包五各地尤為紛亂岫以歸化為西北重
地若疏防守則全局糜爛乃從容坐鎮調遣旗蒙各軍分防
要隘歸綏立保安會令官紳協力維持明示嚴法力靖謠言
故地方秩序卒賴以安當民軍至薩軍報益急或勸曰公可
避去矣岫曰吾老矣負國家重任何惜一死吾去人心無所
繫地方必亂於是日夜籌防不少懈尋民軍過托南下返晉

共和宣布邊局乃定故辛亥之役綏垣始終安靖蒙滿相安
內訌未起羣頌鎮撫之功也民國元年秋始受代去任
齊布森佟佳氏滿州鑲紅旗人嘉慶調歸綏道愛民如子凡
布縷粟米力役之徵悉行觸免三年奉文辦運軍營茶塊蒙
古員弁向城鄉居民及過往商旅強徵牲畜越界包送甚或
調換馳隻商民不堪其擾公出示嚴禁令蒙員自行備辦毋
許勒派閭閻一時咸愛戴之八年擢廣西按察使商民思其德
為塑象費公祠與丹津左右列並崇祀焉
德綸滿州人嘉慶八年以吏部郎中簡任歸綏道因義學廢
弛日久捐廉興修設立規條歷年遵行未替於城南創置義
冢一所掩骼埋骼有澤及枯骨之頌焉先後蒞任十年擢升
長蘆鹽運使

岳祥字壽農滿州人嘉慶中以部郎出守汾州薦升歸綏道二十四年七月抵任時蒙古參領佐領因行商赴山後各部落貿易私立小票木戳給發執照需索萬端商旅幾至裹足道光元年公稟請祿將軍成奏明交晉撫委員查辦公會同審訊將各員懲治商民胥頌其德為立碑費公祠汾陽縣志亦載其政績

覺羅瑞福字芝田滿州正藍旗人少孤性豪爽志氣高邁尤喜樸素既冠以筆帖式趨公慎勤屢薦升部郎為御史轉給事中巡視察院聞有清名人咸敬之道光甲午歲任歸綏道蒞政三載略細節不苛責以休養生為念四野翕然稱良吏焉

阿克達春北京旗籍光緒二年補授歸綏道在任十年其政

績以籌辦善舉為最著。仁心善政，流澤孔長。歸化城向有濟生院一所，每屆冬季，留養貧民，經費所限，有名無實。義學亦僅一處，貧家子弟入學為難。抵任後，即捐銀五百兩，以為首倡。經二、四、五年間，勸募各廳官紳，亦踴躍助資，並以嚴究虎盤、罰寶、豐社錢、商鉅款，共集銀二萬一千餘兩。於是各項善政一時並舉。就楊家巷義學，擴地重修，凡崇祀先師賢儒之所，延師課徒之齋，悉備。又於城之四隅，立義學各一。於道署西偏，修築屋宇，分設牛痘局、育嬰堂、濟生院，則一再展基增宇。十年秋，山西巡撫奎斌按臨歸化，面諭擴充，可容五百人。以收養老疾，其年壯覓食之流民，則另設官店，以棲止之。復撥銀四千兩，充作綏遠城啟秀書院膏火。息本，而以餘存銀一萬五千兩，發商生息，為年支經費。事歸鄉耆經營，不假胥

吏之手。十年奏准立案勒碑。永道自是義學。牛痘育嬰。義墳。敬惜字紙。年修黑河橋梁。謂之七項善舉。終清之世。其制勿替。光緒四年。塞北大饑。歸化流民尤多。賴餐宿有備。保全不少。嘗延崞縣張曾。纂集歸綏識略稿。已具。未及刊行。於十一年夏。升任去。今存有鈔本。是為歸綏方志之權輿。其後歸綏道文保。於善舉亦多。整飭濟生院。收養原以五百為額。但十七八年大旱。住院飢民激增。十九年請准當道。由朔平協賑局撥賑餘銀三千八百餘兩。增建濟生院前後院。住屋數十間。屋內冬加薪炭粥鍋。另屋安設專員監放。不使溼熱。與穢氣交蒸。蓋防住院者發瘡疾而致斃也。於城之西南隅。添購大段義地。掩埋無主之尸。修瘞骨所於南郊。冬寄春埋。勿使暴露。在任將及十年。時稱窮民之福星云。

鄭文欽漢軍旗籍以進士官翰林院檢討光緒二十六年四月署歸綏道篆初到任以士習萎靡思所以振厲之古豐書院朔望課藝皆親臨校閱其文行俱優者則獎勵之不及者則諄諄訓迪之由是綏之學風為之一變薩托拳民肇亂蔓延歸化辱官戕民地方騷然奸宄乘隙竊發往往誣民為教橫肆劫掠鄭即督率廳官籌款招練團勇分駐城郊晝夜巡緝嚴懲不法行之數月民商賴以安堵既而大旱成災各處飢民麇集一面分賑各廳一面示諭歸化城大小客店不准拒絕投宿官為給資又立官米麪鋪低價供應飢民並令各衙署興工代賑故庚子年災亂併至而道區秩序終得維持皆其撫輯之功也嗣以戕教案獲罪論死二十七年春柩寄於西郊龍王廟全市貧民丐者得耗大慟醵資市香楮麥飯

鼓樂前導。哭祭者千數百人。尋四鄉貧農聞訊踵至。祭者益衆。每七日舉行一次。如是者月餘。至運柩出境乃止。恩銘字新甫。于庫里氏。滿州鑲白旗人。錦州駐防。光緒中以舉人報捐知縣。積山東防河功。歷保至道員。嗣改官山西。二十六年夏。拳民肇亂。時署按察使。勸撫臣飭屬護送教士解散教民。以遏亂萌。弗聽。二十七年正月。任歸綏道。先是口外各廳及蒙旗殺教士四十餘人。教民二千餘口。抵任後。教民尚二萬餘口。待撫復。值饑年。賑事尤急。乃請帑金十萬兩。撥發七廳倉穀。為勞來安集之計。會洋兵至大同。百姓聞風。懼擾恩。乃令教士馳往勸阻。洋將信其言。遂收隊去。五月。有主教閔清者。自阿拉善旗三道河教堂奔至。言彼處蒙民約期仇殺教民。禍將不測。恩迅檄包頭鎮馬隊馳往彈壓。蒙衆見

大兵至。皆斂械而散。教士感其義。陳於法使。轉外務部請獎。恩聞之。亟請撫臣岑春煊咨部力辯。莫杜外人干政之漸。恩在任。嚴明有為。政尚綜覈。凡撫民恤蒙保教諸事。一洗前此。因循敷衍之習。為歷任道員之最。有幹濟者。二十八年七月。調任直隸口北道。三十三年六月。在安徽巡撫任內。因民黨起事。殉難。宣統二年十月。子咸麟復補授歸綏道。曹受培。字滋田。廣東番禺縣人。光緒二十八年。以道員候補。山西經墾務大臣。貽穀奏調來。綏襄辦墾務。歷充東西墾局。總辦。以幹練著稱。三十年九月。署歸綏道。篆先是。庚子教案。晉省最鉅。口外結辦尤難。其時教士憤怨方深。多方挾氣。燄甚張。商辦至為棘手。前將軍信恪特調知府壽勳來。綏專辦蒙旗教案。及升任離綏。案多未決。受培承之。悉心清釐。全

案得以奏結斯役也。各旗賠款綜計六十萬兩。視教士所索極為減輕。而又免究釀禍官民將軍貽穀案結奏保以壽勳與受培稱功首焉。三十一年山西保送學員留學日本。乃稟請撫院謂口外學校方興人材難得急待培養免致向隅。於是李景泉龔秉鈞遂得於是年冬就學東瀛。綏人士以官費留學國外者此其始也。復以景泉秉鈞皆寒士月各致數金以贍其家俾可安心求學其獎掖才雋如此。三十二年夏受代去。

胡孚宸字公度湖北江夏縣人以進士官翰林院編修嗣改御史吏科給事中光緒中以奏事忤慈禧太后旨謫外授山西汾州府知府時新政令尚未頒行孚宸下車之始即以實學詔士毅然改河汾書院舊制立經算書史各科期為世用。

一時人材蔚起。課最升太原府知府。又以政績卓異。擢為歸綏兵備道。時為光緒三十二年。古豐書院改為歸綏中學堂。未久規模甚狹。肄業者僅二三十人。孚宸身兼督辦。力謀擴充。籌集各項基金。至十餘萬兩。發商生息。各廳年解學款。亦得二萬餘兩。廣招生徒。延聘名師。悉心教授。次第擴展校基。增築堂舍。規制日宏。文風大振。復推廣各廳小學八百餘所。又於中學附設師範班。以儲師資。並設高等小學。以備中學之發展。用款九千餘兩。購學田一百餘頃。年收租金。以補校費之不足。嘗謂歸綏學子。資質多聰穎。而失於培植。故二百餘年。以學業成名者絕少。在任五年。始終以振興教育為己任。而於道立中學。督課尤勤。學生得其裁成者甚衆。今第一中學居省校之首。綏人追思恢擴之功。必曰道台胡公云。口

外各廳向有冬令差查之例其名目頗多有私造斗秤私藏
烏鎗軍器出口車馬二麥收成保甲門牌人地戶口邪教奸
匪以及採買炭草料豆麥糠棘鍼鞘車等吏役借端需索鄉
民苦累久矣三十三年先後詳准一律永遠禁革全道人民
尤為感頌戊申墾務參案起綏之文武職官強半斥革以去
獨公以清風峻節未列彈章且使護理軍篆時論高之宣統
二年四月卒於任所公平日自奉極儉冠服垢敝望之如寒
儒俸薪往往濟堂費之急略少餘蓄晚清以還歷任道員清
公無出其右者

查克順北京旗籍乾隆三十九年任薩拉齊蒙古民事府通
判廳治北近山溝屢遭水患到任後創築長壩易災害為樂
利厥功甚偉地方迄今稱之先是直廳治之北十五里有大

山兩壁中分溝水自山北穿澗而出名蘇寨水其南有村村廟有康熙五十年石碑謂居民千餘墾地百餘頃山可障風水便灌溉而土宜果木故果園衆多然沿北一帶山洪最狂而澗泉最大者蘇寨溝其一也每當大雨溝水驟漲則直下廳治穿市而過不可遏止乾隆三十八年溝洪暴發全治為漂克順既任事徵夫籌捐創築河壩九百數十丈砌以石塊壓以沙土起東北斜達西南名之曰保安壩俗又謂之官壩同時溝內居民復自築土壩一百九十丈緊接溝口與官壩成平行線形並自山口疊石為渠引水灌田自是水出山而東流以溉村田餘水復折而西去城鄉不罹其害而能受其利皆克順之力為之也壩成自為序刊石今存溝門河神廟中

壽麟。北京旗籍。道光七年補薩廳通判。八年秋水患大作。自蘇寨溝冒隄直下。漂沒田廬。郡人每議修復。舊壩而不果行。至是麟督鄉總復之。當麟修壩時。民索地價。乃丈量壩基。每畝發價銀一錢。堤工既成。飭諭鄉總逐年栽樹。永遠勿替。並於廳西北門外壩前茶亭勒石紀之。咸豐六年大雨彌月。復潰堤堰。通判慶祥農諭鄉總按戶籌捐。募得市錢一萬餘緡。祥農晝夜冒雨躬自督率而修葺之。土壩增高。水患乃息。治北門內有咸豐十一年修築保安壩碑。言之頗祥。哲成額。字省庵。滿洲正紅旗人。道光中任綏遠城糧餉同知。收放銀米。必躬視出納。胥吏無侵剋弊。遇委審事件。判決如流。軍民咸稱頌焉。隨松筠勘定大清山後游牧界止。及安設各卡倫。筠輒倚之。如左右手。去任之日。行李蕭索。有一琴一

鶴之風。

庚棧字仿白。蒙古鑲紅旗人。由刑部筆帖式升禮部主事。京察一等。咸豐八年夏。補授綏遠城糧餉廳理事同知。蒞任後。多所興革。一清積弊。長官以其克勝煩劇。十一年。調任歸化廳。蒙古民事府同知。在任十餘年。訟簡刑輕。士民感戴。同治初。西陲不靖。官軍過境。供億浩繁。棧以一身籌維其間。卒能兵給而民不擾。嗣以河防出力。經將軍彥德保奏。以知府在任。候升賞戴花翎。將軍定安復以循良卓異。保薦以知府遇缺。即補山西巡撫。德以連年運餉支差。一無遺誤。請交部從優議叙。未及遷官而卒。卒之日。士民哀痛。迫切有誰其嗣之之嘆也。同治十三年十一月。紳民樹德政碑。陽高張廷彥為文記之。

文山滿州鑲白旗人自咸豐元年至同治末年三任薩拉齊廳事薩之善舉多其手創同治六年甘肅回首馬化龍作亂竄擾陝邊屠神木縣北掠陰山南草地焚劫至於薩西擅蓋郊仰獨大小余太之間綏西大震山諭商戶居民籌捐助餉練民國同千五百人徵車馬鑄鎗砲設偵探謹汛守分布要隘匪知有備不敢逼廳治聚落而居曩無城郭七年創築城圍不一年而城成居民防禦有資恃以無恐八年加工修築倍其厚而增高之高一丈八尺厚一丈餘凡抽房課附捐近二千緡四鄉近三千緡廳紳周召棠慨助銀三千兩商行認捐銀七千二百兩山自倡捐銀六百兩餘復陸續籌集約合錢一十二三萬緡嗣用餘款建育材書院一所置義園五十畝名恤陰會中建寄骨寺一復以充公地畝捐俸錢建節孝祠育

嬰堂各一。自九年後匪亂平熄。乃復規畫民生。自乾隆以來。黃河在治西四十里間。分作三流。以經治南。上流直今榆樹營一帶。中流徑白廟子。達於冒代。下則今道治南一帶。困於河流而不能耕。山與民約。以四股八厘分工。自治西四十里之王霸窰村築一壩口。迫河併入西南一道。於是合三流為一河。得腴田四萬餘頃。逾年墾闢新地。成立新村八十餘處。以蘇寨溝水屢毀。治北故隄。諭商行鄉耆總領籌捐。經款築隄補樹。一郡大治。山建書院。為籌息本六千緡。發商年收息七百二十緡。聘教授四人。分科授學。同光間再任薩廳。一郡歡迓。有并州免童竹馬迎郭。伋之風焉。山赤面白鬚。在官寬簡廉勤。務期實惠及民。不喜虛譽。自奉甚儉。恒着布衣。為民表率。三任十年如一日。論者高之。有薩民紀功碑。一存城內。

武廟一在王霸窰壩口一在節孝祠
德生字佩九漢軍正藍旗人同治乙丑進士由庶吉士散館
授雲南知縣嗣升直隸州改省山西光緒五年七年十二年
十六年四署歸廳篆熟於邊情悉心興革廳民重農商不知
興學德生在任數年釐序漸立士習彬彬然綏民至今樂道
之
恩承寧夏漢軍旗世襲雲騎尉光緒九年捕托克托廳通判
為人誠篤廉正敢為時托屬河口鎮魚炭兩行各有私捐呈
准藩司歸公歲令民領帖納稅私牙屏息城內鄉耆岳恒瑞
劉登龍以繕修黑河長橋公議由糧行籌款每糧一斗由買
賣主各出制錢一文名曰斗捐行甫二年承至改歸官辦以
所得款撥作捕盜營津貼又修治河隄沿隄栽樹以固城防

設義學二處以興教育。並於第一義學附設郁文書院。以課士子。呈准山西巡撫改斗捐為斗釐。經奏飭全國一律照辦。各省之有斗釐自此始。托俗務農商不重讀書。聞保德州舉人王鳳岐有文行。聘為山長。以授經史。至是教化大興。朱氏子為戶科吏。頗富。其族兄貧無以卒歲。除日就乞貸。朱譴辱拒之。承聞召朱責以不篤宗族。罰錢三百緡。以益隄樹。初東岡故城內有大倉。一曰官倉。有廩五十。儲糧頗多。一曰社義倉。存空廩三十三年。承議建孔廟而乏大木。鄉耆以社倉曠廢久。請用其材。乃興工建廟。旋卒於任。托屬文風之振。蓋承倡導之力為多也。

鄭景福直隸大興縣舉人。光緒九年補薩廳同知。學術淵博。工隸楷。能文章。崇儒好士。每公餘即赴育材書院為諸生講。

授經史。改正文藝。多士愛之。若友戴之。若師。好以重刑治盜。賊明果勤慎。長於折獄。前任屢訊不決者。景福一鞠而結。喜飲酒。人謂飲愈多而神智益清。每日晨起坐堂皇聽訟。至午方止。下午亦然。每案結後。輒遣役大呼曰。有訴者來。或稱貧不能具狀。則令面訴。立為判決而去。以故案無留牘。民不費時。衆皆德之。後人樹碑以誌去思。所述政績皆實錄也。

張煥字壽山。直隸廣昌縣附貢生。以通判試用山西。光緒十年初。署和林格爾廳。繼調署薩廳。十五年復任。和廳事。曩年各村歲納錢糧草豆。支應車差役苛派。藉以索賄。乃嚴革其弊。明定辦法。若累悉除。人民便之。社會積糧必集。公正紳民妥議。勸捐無取。咸迫遇訟者。至小勸速。和大則速斷。惟恐有誤農時。署中所需。概發市價。不沿舊規。常以勤儉教導。導廳

民而以身作則亦近代之循吏也。
徐焯陝西朝邑人癸酉拔貢生光緒十二年任薩廳事時值
七廳奏設學額焯獎勵士子甚摯踰年得儒童四十人錄於
學使者四承放土默特六成界地經畫有則農民便之創修
常年豐備諸倉十九廩勸積倉穀至一萬四千八百餘石分
儲廳城色鎮迨辛卯壬辰歲大饑資以賑恤至今士民德之
方龍光字和甫安徽桐城人光緒十九年蒞任歸廳善決獄
案無留牘公廨不蔽風雨捐廉修葺不以科派擾民民是以
有去思。

劉鴻逵字子儀直隸昌黎縣人光緒十七年任豐鎮廳同知
值辛卯壬辰連歲大旱倉儲不敷賑濟又以奏撥賑款難待
邀集富戶勸捐錢穀勘查災口必躬親散給不假手於人民

沾實惠。全活甚多。復辦冬賑。立卹幼局。以收養孤幼。無告者。既請准豁免糧賦。補修倉廩。使各鄉積穀。以備荒旱。當鴻遠之辦。豐賑也。有潘民表者。由山東卧牛山賑務。差次稟明山東巡撫。集款數十萬。來豐賑放。偕員余士祺。管錫臧。襄助其事。發放既竣。仍恐有流離失所者。復設東西義賑局。收養男女。飢民數百口。延請工師。教以紡織。局內並設義塾。以課讀。貧寒子弟。既乃以節餘銀二千五百兩。錢一萬八千餘緡。購新地三十六七頃。招貧農墾種。餘款發商生息。補助局費。豐賑獲此鉅款。又得鴻遠悉力規畫。以成民表之義舉。故當時辦賑成績。為各廳冠。二十三年。改任歸化廳事。所至抑強豪。扶善良。聽斷明決。人不能欺。一時有能吏之稱。廳之西郊龍王廟村。有農民訴一貧婦入田竊其南瓜。並呈大瓜數枚。為

證劉見婦抱一乳兒。即問告者曰：婦竊瓜時亦抱兒乎？告者曰：然。劉乃令告者抱兒與數瓜重演竊瓜時情狀。告者展轉提抱不能並舉。劉怒曰：汝壯男子尚不能抱兒攜數瓜，彼貧婦反能之乎？告者驚服，語塞。劉究知為農民戲婦被詈而反誣之也，乃罰資與婦。其明於折獄類如此。邑人嘗取其事製歌曲焉。

周桂敷，涿州人。光緒十七年攝薩廳篆。廳境袤數百里，廣千餘里，有黃河之利。承平既久，地沃民富，集鎮多而物產豐。西鎮之包頭，水陸交通，商務尤為繁盛，號稱大埠。每新官到任，各大市鎮由商行例納公費銀共約一二萬兩。桂敷下車稟明長吏，汰其十九而公布之。每歲僅由薩商交公費九百兩，包頭一千二百兩。勒石永著為令。百年積弊，一旦革除，又限

制。包。商。虎。盤。整。頓。市。面。招。放。土。默。特。六。成。糧。地。以。裕。賦。課。光。緒。十。八。年。卒。於。任。薩。之。商。民。刊。德。政。碑。以。誌。其。事。碑。存。城。內。武。廟。

儒。芳。字。莘。之。滿。洲。鑲。白。旗。人。光。緒。庚。辰。進。士。十。八。年。署。歸。廳。篆。歲。饑。經。上。官。委。知。府。錫。良。會。辦。冬。賑。及。春。撫。事。身。任。其。艱。募。捐。采。運。分。設。七。廠。隨。籌。隨。放。又。立。計。穀。散。錢。法。俾。山。後。飢。民。就。近。購。食。屢。稟。上。官。乞。撥。鉅。款。兼。借。籽。種。哀。詞。籲。告。見。者。泣。下。以。是。諸。廳。之。民。全。活。無。算。

樊。恩。慶。字。筱。亭。河。南。密。縣。監。生。光。緒。二。十。年。補。托。廳。通。判。為。人。誠。樸。不。飾。邊。幅。蔬。食。布。衣。為。政。廉。簡。民。有。訟。者。不。待。具。狀。立。予。評。判。使。去。守。托。數。年。如。一。日。勸。商。民。捐。貲。糴。穀。備。荒。葺。倉。修。堤。地。方。賴。之。下。鄉。驗。案。勘。災。輕。騎。減。從。惟。恐。擾。民。二十。

八年秋由應州調洋務局處理義和拳仇殺教民案力持寬平保全甚大在任成績屢報卓異公餘輒微行街市考察民間風俗或詢問鄉民疾苦約束吏役維嚴而於緝捕最勤工技擊養壯士每午夜從之捕盜遇地痞必盡法懲之歷任歸化薩拉齊五原各廳明刑飭法盜賊屏息清公為當時之冠閻繼忠山東海陽州舉人家貧入京為王府教授博學善榜書由大挑於光緒二十一年補薩廳同知廳署坍塌將百年歷任皆獄城內粟店繼忠蒞任傳諭四鄉俾認捐款以修公署上地每畝捐制錢五文中地畝三文下地一文遂成鉅款荒庭敗屋徹底興修逾年衙署一新移入居焉地方乃復知有廳署父老相謂自廳署修復而地方百業始轉繁榮云李恕直隸大興拔貢廷試一等以知縣用光緒二十五年通

判托廳嗣值義和拳起於清水河廳勢甚張經痛剿出界竄
和林遂趨托境怒為政嚴切抑奸鋤強頑梗畏服謂之李剝
皮在托整頓庶政頗著循聲拳衆入托河怒斥為邪教衆責
其亢而繫之怒年六十方盛暑著短衣被牽遊市中如是者
月餘雖舉刃加頸無懼色已而聯軍陷京師教民復起怒責
道廳山西大吏歸罪於怒以知應州樊恩慶曾治托為教民
所仰飭赴歸綏洋務局辦教案教民攻怒提訊擬斬監候怒
知不免仰藥死怒鋤惡賈怒死非其罪人皆寃之
姚學鏡字仁山浙江歸安縣人以幹才著稱為山西巡撫錫
良所知光緒十八年嘗隨良駐綏放賑因備悉綏政利弊二
十三年巡撫胡聘之委令幫辦歸化關稅務本關監督曩以
歸綏道兼任坐擁虛名假權猾吏每年解部不過二萬餘兩

自收歸省辦。學鏡銳意整頓。年增庫帑十餘萬兩。嗣創辦歸化斗捐及百貨釐金。歲增庫帑又十餘萬兩。遂得理財之譽。二十七年。建議抗錦蒙鹽收歸官賣。設鹽務局於包頭。歲盈五萬餘兩。會貽穀奉旨開辦。察綏蒙壑道經太原。徵詢能吏。巡撫岑春煊以學鏡薦。總辦西盟壑務及西路壑務公司事。五原設治。兼任同知。重濬後套八大幹渠。三十年後。套劉天佑作亂。套地騷動。學鏡親履戎行。襄辦軍務。月餘。天佑就擒。功居前列。論者謂其聯絡蒙旗。撫綏套衆。興利除弊。措置有方。故所至輒著政聲。積功保升。以道員用。嗣因壑務參案起。被謫落職。學鏡為人精明幹練。任壑務後。設廳建署。奏定學額。三十一年。曾開試場於包頭。以倡導文風。晚清口外稱能吏者。羣推章同與學鏡云。

孫多煌。山東優貢生。由鹽提舉於光緒三十年補。托廳通判。時教案清結。地方無事。多煌守法奉公。與民休息。惟時黑河屢漲。刷毀河隄。廳治近河。人情洵懼。多煌呈請山西巡撫張曾敷撥款修治。具奏獲准。撥賑款庫銀二萬兩。修復之未及領款。罷去。繼任者為魏鑿。揚州廕生。三十一年來。托款集工修隄。自近河之面加厚五尺。加高三尺。自是長堤堅固。全城獲安。明年山西巡撫飭歸綏道來托視察工程。優予獎叙。鑿治托案。無留牘。以世家子補吏。家富而自治嚴。論者稱真不愛錢。其修堤之次年。東岡古城中農人掘地得銅砲一具。上鑄洪武二年造。重四斤七兩。字相傳。洪武初。明將克此城。四年置為東勝衛。

劉守德。號誠齋。河南人。光緒三十一年。蒞薩廳任。守德家鉅。

富服官廉潔蒞薩三年其家屢寄銀於任所共達三千兩文
章典雅嫻於吏事其判牘之佳者庠士往往能誦之去任時
薩民製牌傘贈之守德置酒謝曰吾愧無善政及民不敢攜
此留商會作紀念可也商民感其清德每逢歲時令節則陳
列於庭而展覽之

張嘉楨字幹臣直隸武清縣人光緒三十二年任歸化城廳
事嘉楨在部主案牘久嫻於吏事尤長折獄決斷精敏民無
冤滯日坐堂皇口詢手判數案立結曲直悉當奸豪折服吏
不敢欺時道台胡公整頓中學籌集學款嘉楨以首邑力倡
之勸各商捐基金甚鉅經收菸酒稅盈餘亦請每年撥作學
費嚴懲市面虎盤勒碑示禁在任年餘政聲卓著錢商李光
春恃與大憲往還嘗於象中辱嘉楨嘉楨憤然曰市儈驕橫

至此民尚知官府之尊耶立拘押而責之三十三年夏辭職去

余寶滋字蘭賓陝西安康縣舉人光緒三十三年補薩廳同知下車以小學無多先設師範傳習所以造師資改書院為學校城鄉之間一時成立學校六七十處城中各校日必考其勤惰而獎誡之又保送李獻瑞等遊學日本時各廳地方設校無早且多於薩者故清末薩之學務獨為發達寶滋提倡之功也時將軍貽穀創修志書寶滋聘曲沃仇汝嘉編纂廳志書成未及付刊而去任稿存廳署民國四年冬盧匪破城入署竟燬於火

劉瀛福建人以進士於宣統三年春補薩廳同知兼領歸化關稅務監督為人短小精悍有智略善折獄凡前任疑案屢

鞫不決者瀛一訊而服案到即審隨審隨結登時懸判無稍
差謬民稱為清官

章同字覲瀛湖南長沙人光緒季年各省厲行新政同歷治
崢縣忻州舉辦學務警政工廠農場治績稱最宣統元年任
豐鎮廳事豐多忻崢人習聞其政聲至是羣情懽蹈下車即
詢民疾苦懲強暴以安良善勤聽斷以清訟獄城內街道向
不整齊大事修治力倡衛生挑練巡警整頓學堂均增廣其
額而嚴課之立自治事務所勸學所習藝所改良看守各所
與城內高等小學皆新式建築規制一新更為開通風氣創
置模範女學簡易識字塾多處設四鄉區巡以稽察姦宄在
任數年教化大行凡有興作收支必委紳商不經衙署以防
弊竇信賞必罰人皆畏服是年廳境亢旱成災籌集鉅款賑

恤。飢民得免流離。三年夏豐之紳民李苑林等百數十人為立碑表其政績焉。

顧兆魁直隸清苑人。咸豐二年八月以和林格爾巡檢奉委運湖南軍餉。遇寇殉節。經部議卹。從祀昭忠祠。世襲雲騎尉。

↑ 民國

張紹曾字敬輿。直隸大城縣人。民國元年九月任綏遠城將軍。歸綏新舊二城向為漢滿蒙回雜處之地。鼎革之際。雖經將軍堃岫力持鎮靜。地方得免變亂。及宣布共和後。以未深悉政體。故民族疑猜漸起。且兩城主客軍隊訖爭之事。時有發生。商民惴惴自危。咸虞禍亂之將至也。公蒞任後。積誠相感恩威互用。內禁乃日見鎮定。惟烏伊二盟。民國成立已歷八九月。迄無隻字往復。先是庫倫獨立。一再文檄兩盟促統。

一蒙古自立為國其時政府既未能實行保護外蒙又聲勢日逼各王公迎拒皆非旁皇無主而伊盟曾兩次覆文庫倫申明大義深致懷疑獨立之意其事甚可嘉也公以兩盟本為軍府所轄長此情意睽隔終非大局之利決定召開西盟會議照會各旗扎薩克來綏共謀福利亦即以斷絕庫倫煽惑宣布共和真旨也時烏盟盟長四子部落扎薩克勒旺諾爾布資望較著為兩盟推重特派朱泮藻為招撫使率軍赴旗邀致於綏垣繼而各旗長踵至二年一月開會蒙情悅服實行贊助共和通電否認俄庫協約並議定西盟要地駐兵保護及籌畫生計振興教育諸大端與議王公均經中央晉封爵秩綏蒙之局甫定庫匪之亂繼起沿綏庫大路侵入內蒙占據白靈廟以為根據乘勝南進欲遂掠歸綏二城匪以

三路來犯。五武陶各縣北境。大受蹂躪。駐軍屢戰未克。滂江之役。營長謝樹棠退卻。公命斬於軍前。以徇。繼乃電調陸軍第八十混成團來綏。七月。由團長徐廷榮率隊援朱泮藻軍於厥汗合老。至是軍勢復振。步馬礮兵並進。是月七日。占領黑沙圖廟。匪敗北退。進占召色嶺。八日。大戰於厥汗鳩鵠。殲匪甚多。卒於十日攻克白靈廟。斃匪千餘。餘皆潰散。廟地三面皆山。形勢險要。匪專力據守。賴將士用命。乃告大捷。克靖邊氛。比軍凱旋。公親出北郊慰勞。喜邊民得脫兵革之禍焉。清末民初。綏垣屢瀕於危。而終歸安定。前有堃岫之保境。後有紹曾之戡亂。其功績不可沒也。

馬福祥。字雲亭。甘肅河州人。清時積功。以提督記名。統昭武軍。辛亥駐軍蘭州。衛護地方有功。嗣任青海辦事長官。阿爾

秦護軍使。民國元年十月，庫倫獨立，蒙兵南犯。綏寧振動，福祥移鎮寧夏。活佛王德呢瑪率領蒙匪響應，內犯福祥。設計誘擒，擊潰其衆。綏西亂事立平，包頭五原人民立碑紀功。語見軍事二年。改任寧夏將軍兼護軍使，駐寧八載。於疏濬河渠，賑恤震災，剿除匪患，尤著勲勞。十年調任綏遠都統。綏區學務，歷由道尹兼辦，官非專司。事少進展。十一年秋，公乃設全區學務局，以重其事。嗣復請准改為教育廳。至是而後，全區教育始得日見改進。公性仁厚，政從寬大。以綏民久被匪灾，不輕有所科派。休養既久，元氣充復。故民十五以前，民物稱殷阜焉。常謂地方政治，必官紳協和共濟，則為力易而收效速。治綏一本此旨。曩者歷任都統，不欲地方人士與聞政事。即中學校長亦為調劑候補知事之地。長校者視同傳舍。

一年或四五易校務乃大壞自設學務局即以全區教育界諸地方遴員負責整頓其他行政亦多參用綏人量材器使俾有以自見初識拔在京議員郭象伋長教育繼延李景泉任道尹由是綏之才俊得公獎拔或綰軍符或膺民社爭自樹立從而成就者乃日象在任四年政通人和綏民頌聲載道焉

張鼎彝字子銘直隸獻縣人民國三年五月任和林格爾縣事勤政愛民循聲卓著縣位於山溪之間東南諸峯峻峙每值淫雨山洪崖瀑為害甚劇沿縣治之南直瀉而西田廬漂沒平地冲刷皆成河渠居民甚苦之鼎彝倡集鉅資修築河壩以防衝決開治渠道以殺水勢自是縣境山洪不為害農商相慶為立德政碑於東門外五年七月卸任去綏七年入

都署任總務處長。繼長財政廳事。公暇潛心纂述。以歸綏識
略年遠多缺。山西通志限於體裁。又以一隅視之。思成綏之
方志。以存典要。初成數篇。而中輟。墾務總辦元愷見之。力贊
其事。越歲成綏。乘十一卷。都十三圖。六表。五考。二略。於疆域
山川要隘古蹟考據頗稱精核。而終之以墾務水利二略。特
揭治綏之要。尤見遠識。九年付梓。行世。為近年攷見綏遠文
獻之要籍。十年夏在財廳任。以遞補衆議員孫洪伊缺。謝事
去。

元愷字虞卿。直隸天津縣人。初以知縣需次。山西光緒庚子。
晉南大饑。嘗奉委與姚學鏡由山東臨清運漕米十萬石賑
飢民。甚著勞績。二十八年奉調來綏。會辦西盟墾事。總辦姚
學鏡深相倚重。先後修濬後套大渠八道。放地萬二千頃。民

國以後代理土默特總管署財政廳廳長皆有政聲。七年改任都統署總務處長兼實業處長。目睹綏城旗民生計困苦。請准以渾津黑河十三圈地安插旗丁。按地等差計口授田。每人二十至五十畝。給銀幣數亦如之。以為籽種牛具費。得安插者達千六七百口。其總辦墾務時。因後套地多黏土。必經河水澆灌。始能播種。而能澆之地。年無定數。向章則按原領地數徵租。民戶致多積歉。追比呼號。套民苦之。愷乃為另定辦法。完賦多寡。以青苗為準。據情達部。允准。自是丈青之法行。而套民食德矣。十二年以病乞休。二十三年卒。年六十。周登皞。字熙民。又字補廬。福建侯官人。光緒戊子舉人。考取咸安宮教習。俸滿。以知縣用。奏充順天中學監督。兼五城中學教習。歷任寧河。武清。靈州。東安。知縣。順天府糧馬通判。順

天府治中趙州直隸州知州所至清理積案興辦學校防堵
河患誅鉏盜賊嘗謂作吏固以清廉為本然不能興利除害
則尸位而已於民何補先後得旨嘉獎三次辛亥十月補遼
瀋道協理御史不旬日升掌浙江道兼山西道監察御史民
國三年肅政使官制成立各部長交章保薦既就職首劾貪
吏京兆尹王治馨霸縣知事劉鼎錫悉寘諸法名重一時六
年秋簡任綏遠道尹與都統蔡成勳同時蒞任值盧占魁匪
股受撫後蹂躪後套愈甚都署主剿辦部院頗疑慮公上書
各當路剴切陳詞竭力主剿迨匪亂既平以民間利病吏治
得失慮未能周知廼出巡各縣詢問疾苦密陳大府地方陰
受其福八年春以匪患已告肅清亟應銳意振興學務於是
召開第一次全區教育行政會議並請准由各縣代表成立

全區教育會以為研究改進之地。籌撥三厘斗捐為辦學的款。委邑紳司出納。又籌各縣田房學捐為士子留學基金。時綏區所轄八縣僅有中學一處。向學者未能踴躍。乃設法獎勵。令學生家種田者年免差徭二項。生徒遂以日盛。馬福祥治綏時。公以謂道尹兼管學務。職責未專。乃請設學務局。以資改進。綏區舊有混成旅。由地方發餉。及馬都統蒞任。所率寧軍足資防守。乃赴贛商以全旅撥歸。蔡督人民負擔。賴此大為輕減。十三年春卸任。改參都署政務。十四年春離綏。退居津門。課徒自給。從遊者日衆。著有補廬詩文集若干卷。王文墀字沛生。山東濟寧人。清光緒丙午優貢。以知縣用。民國四年三月任五原縣事。五原自光緒末設治。尚未建築城署。寄治色頭。已歷九任。文墀接篆。聞邑紳王同春、崔國仁於

三年間籌資鳩工築城於隆興長遂毅然就道由邑移五所屬商民始知縣有長吏人心乃定繼而練勇設防興學布教客民漸集而農田水利日以推廣在任五年治績斐然當六年春盧占魁就撫部衆複雜時借徵糧為名沿村劫掠所部兩團分駐烏蘭腦包狼山灣自春徂夏搜糧達七千石民不堪命逃者接踵文墀力籌安輯商諸紳董分立軍糧局以抵制之於是秩序漸復未至釀成事變套民深德之十四年一月再任五原至秋去職十七年一月任臨河縣事未幾卸任常以居套久輯見聞所及為臨河志上中下三卷二十年春梓行於世

郭成鈞字秉衡安徽滁縣人民國七年知涼城縣事縣自鼎革以還年易一官視同傳舍庶政率多廢壞成鈞到任訟案

待決者叢集。經數月剖晰而積案一清。人民懽頌。縣有學田頗多。而學款常苦支絀。成鈞乃定投標法。防除弊混。年增田租數倍。入款既充。增設女學。以開通風氣。當民國六七年。縣城較大。商家濫出私鈔。名曰憑帖。官不限制。發行無度。漸至不能兌現。而錢法大壞。現幣一元易市錢至五千餘。粟店當行紛紛閉市。因歇業而貽害民戶者。不知凡幾。成鈞急籌救濟之法。八年秋。示諭凡私鈔須具五家商保。方准流通。又籌設公錢局。集富戶股。發公鈔六千元。藉以調劑。有抵品者。即可息借。農民稱便。而商務始漸有起色。紳商愛戴。為勒石頌德政焉。

柳文林。字西樵。遼東營口人。秉性鯁直。守正不阿。民國十五年春。任興和縣事。適值戎馬倥傯。荏苒嘯聚。下車後。即以恤

民捕匪為先。減料派以恤農商。明賞罰以緝盜賊。本治亂用重之旨。遇不逞之徒。盡法懲處。不少寬假。一時奸刁望風革面。期月而秩序大定。遭難鄉民赴署哀訴。必設法周恤。不令失所。去官後。縣民立石紀事。以示不忘云。

呂咸字著青。直隸涿鹿縣人。民國十六年九月任臨河縣事。臨河於十四年夏由五原分治。時局長蕭振瀛創建城市。勸移商業。日謀收回。庚子賠教之黃土拉亥渠地頗著。政聲為民稱頌。咸到任兼充綏西水利總辦。乃重申前議。力倡收回。蓋縣西境舊有是渠。創於河曲楊氏。尋就湮。及庚子賠款。渠地遂歸教堂。經營其後。境內教民日多。亦斯渠利益。有以誘致之也。咸上書當道。瀝陳利害。集當地紳董組設會所。合力進行。既而教士一再爽約。延不與議。遂毅然以無條件收回。

呈上報可而一百二十里之長渠一千八十頃之腴田一旦
收歸國有厥功偉矣初縣築城工半而止致有石海之變至
是督工完成之境內駐軍供億無度乃力爭約定支額額外
莖草粒粟不任強索任事僅半載而去長才幹略未竟所施
臨民迄今猶頌其收渠之功焉

王廷佑字佐宸直隸寧河人民國四年春以綏遠警備隊第
一路分司令駐守托縣托自甲寅以還盜賊蠡起各村皆被
擾害自廷佑至托游擊無虛日民賴蘇息是年秋在黑水泉
達爾麻營乃只蓋村一帶剿匪殲除周老穴股擊斃馮古元
擒斬董老熊王長壽餘衆斬獲極多悍匪孟占元糾黨千餘
出黑牛溝焚劫察素齊將趨河托人心大恐卒以防守得力
匪知有備未敢入境士民感之其後綏遠暫編騎兵團第三

營長王世霖於十二年率軍駐托亦以剿匪著功以縣無城
可守屢為匪乘知事徐燾被虜殞命乃倡築圍牆修建礮台
托河防守至是始固世霖字紹臣安徽無為縣人
郭廣田字士和直隸徐水縣人民國三年任和林格爾縣警
佐剿除土匪保護商旅知事張鼎彝甚倚任之四年七月匪
首齊鳳林等十一人由涼城竄擾境內廣田率警往捕至馬
家窰與匪遇力戰中流彈而死時月之二十七日也事聞優
予給卹

劉少堂直隸南宮縣人民國五年充和縣警佐十一月由托
竄來土匪百餘名少堂率警往剿行至大興地一帶與匪接

戰卒因匪衆兵寡中彈殉職縣人深痛惜之

張玉衡清水河縣警佐民國六年十二月盧占魁匪股入境

率警隊往禦以匪衆兵寡奮戰而歿。
趙承閣奉天錦縣人東勝縣警佐民國九年九月率警剿匪。
深陷重圍激戰良久自知不免揮力殺數匪中彈而殞。
谷長貴山西右玉縣人歸綏保衛團教練民國二十一年四月
月在東區大車溝鄉剿匪陣亡。

